


申
14



泉南雜誌卷上

白鯨暗曰泉州舊安明曰橋李陳懋仁無功著四民

泉州有浯江郡志云晉南渡時衣冠士族避地於此故
又名晉江余謂江旣以晉得名何當時人文遺事無
一可稱豈簡冊逸而無徵卽避地事亦傳聞耶晉書
地理志武帝太康三年置晉安郡統八縣晉安一也
然則武帝已舉晉名其縣或不待元帝在建業而始
以晉名其江也載記符堅封慕容垂泉州侯此泉州
乃漢昭帝改燕國爲廣陽郡統縣十之一今畿輔瀟

縣地非閩之泉州也閩泉乃隋文帝以豐州改今晉
江則唐元宗以南安分置按蔡容述泉州始於泉州
泉之人文至唐貞元中始得歐陽公詹按唐書公與韓
文公李觀李絳崔羣王涯馮宿庾承宣聯第皆天下
選時稱龍虎榜是科知貢舉陸宣公也自公之後名
賢繩繩逮我明文章德業之盛不特凌往代已也
萬安橋乃宋蔡忠惠公所造世謂洛陽橋是也落成公
自爲記曰泉州萬安渡石橋始造於皇祐五年四月
庚寅以嘉祐四年十二月辛未訖功繫址於淵醜水

爲四十七道梁空以行其長三千六百尺廣丈有五
尺翼以扶欄如其長之數而兩之糜金錢一千四百
萬求諸施者渡實支海去舟而徒易危而安民莫不
利職其事者盧錫王實許忠浮圖義波宗善等十有
五人旣成太守莆陽蔡襄爲之合樂讌飲而落之明
年秋蒙召還京道繇是出因記所作勒於岸左公自
書大方尺分勒二石今在公祠蓋公之功在百世大
矣而記僅一百五十三言可見古人不肯擅美如此
又聞之父老云先時二石爲倭載去後見江閒發光

探之得後一石其前一石乃後人復模故前石不如
後石之瑩潤打碑聲時與江濤競響也俗傳公造此
橋限以濤勢不能繫址乃檄江神得一醋字公云什
一日酉時爲之今公記中無是說也王遵巖曰豈其
駕長江之洪流馮虛以構實其役有足駭人者昧者
驚焉而言之異亦以賢者之所爲興事起利人樂其
成而賴其功故托於神以美之耶又宋釋太初謂前
記多三字至今傳其言也

盤光橋自洛陽橋東接鳳嶼嶼在江中央上多腴田稠
民居舊有石路潮落路出行者病之宋寶祐中僧道
詢募貲作石橋長四十餘丈廣一丈六尺比蔡端明
所造洛陽橋長多四十餘尺闊多一尺世知洛陽而
不知盤光者蓋以人重也雖然貴賤異等若道詢一
行腳耳無藉勢位而功力過之則其名胡可泯泯且
洛陽橋尙有百五十三字之記此獨無之意當時道
詢不欲居其功以垂後名耶抑本有記而歲遠湮廢
也

淳化閣帖十卷宋季南狩遺於泉州已而石刻湮地中

學海類編 卷之三
久之時出光怪櫪馬驚怖發之卽是帖也故泉人名其帖曰馬蹄真跡余按沈源釋文序云是帖納郡庠歲遠剝蝕其後莊少師氏復摹以傳則今帖非馬蹄真跡乃莊氏摹刻也其石先屬張氏後以其半質錢於族祕匿不返至於構訟於是各翻木刻足之分爲兩部今所傳者旣非宋遺而莊模亦皆割裂遞更遞失矣惟蔡沙塘憲副家所藏七塊完好不剝蔡甚寶之甚爲難得欲得莊刻之全與蔡之所藏必求數家而合之然不易也又按沈源所云莊少師者不知何

名攷泉郡志有莊夏者登淳熙八年進士歷官侍郎封永春縣開國男卒贈少師有文名他莊無仕少師者故知是帖復摹乃莊夏也

泉州察院堂左有宋太宗戒石銘碑乃黃山谷作擘窠大書其下有高宗行書跋語云近得黃庭堅所書太宗皇帝御製戒石銘恭味旨意是使民于今不厭宋德也因思朕異時所歷郡縣其戒石多置欄檻植以草花爲守爲令者鮮有知戒石之所謂也可令摹勒庭堅所書頒降天下非惟刻諸庭石且令置之座右

學海類編 卷之四 遊覽
爲晨夕之念豈曰小補之哉跋後有一伍字乃高宗御押也又其下有小楷書呂頤浩題疏云臣等竊惟太祖皇帝武定天下而太宗皇帝文以撫之是時□□□□民赤子新去湯火哀矜□乃發大訓垂諸庭石如雲漢在天爲光昭回其施在下則爲露爲雨民涵斯澤豈其有極而吏更歲久或不知誦斯文矣皇帝撥亂安民規撫祖宗乃六月癸巳詔以黃庭堅所書刻之石將以墨本賜天下使日見而知戒焉嗚呼此盛德大業之本豈特讀正觀政要而太息哉臣

等材駑不足以佐萬分而知贊且勵蓋不獨郡邑之吏洗然於茲賜也謹昧死書於左方紹興二年七月癸酉端明殿學士左朝議大夫簽書樞密院事權參知政事臣權邦彥左通議大夫參知政事福建江南西路荆湖南北路宣撫使臣孟庾左通奉大夫守尙書右僕射同中書門下平章事兼知樞密院事臣□□特進尙書左僕射同中書門下平章事兼知樞密院事都督江淮荆浙諸軍事臣呂頤□謹題按是銘非太宗御製也四川通志孟昶著官箴云朕念赤子

盱食宵衣託之令長撫養安綏政在三異道在五絲
驅雞爲理畱犢爲規寬猛得所風俗可移無令侵削
無使瘡痍下民易虐上天難欺賦輿是切軍國是資
朕之爵賞固不逾時爾俸爾祿民膏民脂爲民父母
罔不仁慈勉爾爲戒體朕深思太宗第取下民易虐
上天難欺爾俸爾祿民膏民脂四句移後二句居前
以爲銘便自簡當意完而無累澀之氣
又有高宗御書籍田碑云朕惟兵興已來田畝多荒故
不憚卑躬與民休息今疆場罷警流徙復業朕親耕

藉田以先黎庶三推復進勞賜耆老嘉與世俗躋於
富厚昔漢文帝頻年下詔首推農事之本至於上下
給足減免田租光于史冊朕心庶幾焉咨爾中外當
體至懷故茲詔諭想宜知悉其下有小楷書牒云泉
州紹興十六年九月十九日準行在尙書禮部符準
屯田關四月八日準紹興十六年四月六日敕中書
門下省臣寮劄子奏欲望聖慈勅令郡邑以近降御
筆藉田手詔模刻立石於聽事所如戒石之銘俾朝
夕省觀罔敢墜失庶有以廣聖志承天庥蒙屢豐年

學海類編 卷六 遊覽
與嗣歲之應天下幸甚取進止四月六日三省同奉
聖旨依奏牒州施行本州今恭奉聖旨摹刻立石于
聽事所者紹興十七年三月□日立左從政郎司法
參軍權察推臣曾汪右從事郎節度推官臣余麟右
承議郎簽書節度判官廳公事賜緋魚袋臣方周弼
右承議郎添差通判軍州主管學事兼管內勸農事
借緋魚袋臣王鑄右承議郎通判軍州主管學事兼
管內勸農事賜緋魚袋臣韓習左朝散大夫知軍州
事主管學事兼管內勸農使賜紫金魚袋臣陳康伯

此碑在戒石銘碑之右石俱精瑩煜煜有神氣

衛西榕樹幹大如一間屋枝上有纒纒垂下者謂是根
也其高參天枝葉蔭可三十餘丈相傳韓少卿國華
爲郡誕魏公日樹杪爲吐烟靄又云榕樹千年者其
上生伽枒香

德化縣白瓷卽今市中博山佛像之類是也其坏土產
程寺後山中穴而伐之縷而出之碓極細滑淘去石
渣飛澄數過傾石井中以漉其水乃塲填爲器石爲
洪鈞足推而轉之薄則苦窳厚則綻裂土性然也初

似貴今流播多不甚重矣或謂開窠時其下多藏白
瓷恐傷地脈復掩之

閩之遠海近番處有燕名金絲者首尾似燕而甚小毛
如金絲臨卵育子時羣飛近汐沙泥有石處啄蠶螺
食有詢海商聞之士番云蠶螺背上肉有兩筋如楓
蠶絲堅潔而白食之可補虛損已勞痢故此燕食之
肉化而筋不化并津液嘔出結爲小窩附石上久之
與小雛鼓翼而飛海人依時拾之故曰燕窩也

泉郡荔枝雖鬱爲林麓然不若福興兩郡之盛絳囊翠

葉明秀可愛蔡端明所謂殼薄而平瓢厚而瑩膜如

桃花紅核如丁香母剝之凝如水精食之消如絳雪

誠哉荔枝譜

四十二種

垂五百餘年品目雖存漫不可據今

惟五月熟者曰火山肉薄而酸六月熟者曰早紅曰

桂林曰白密曰狀元紅曰金鍾俱稱佳品七月熟者

味甘酸曰山荔枝蠲渴補髓多啖無傷韓偓荔枝詩

云封開玉籠雞冠溼葉襯金盤鶴頂鮮想得佳人微

啓齒翠釵先取一雙懸又巧裁霞片裹神漿崖蜜天

然有異香應是仙人金掌露結成冰液蒨羅囊可謂

學海類編 卷八 遊覽
形容之妙矣蔡端明曰荔枝之於天下惟閩粵南粵
巴蜀有之漢初南粵王尉佗以之備方物於是始通
中國司馬相如賦上林云荅逖離支蓋夸言之無有
是也東京交阯七郡貢生荔枝支十里一置五里一候
晝夜奔騰有毒蟲猛獸之害臨武長唐羌上書言狀
和帝詔太官省之魏文帝有西域蒲陶之比世譏其
繆論豈當時南北斷隔所擬出於傳聞耶唐天寶中
妃子尤愛嗜涪州歲命驛致時之詞人多所稱詠張
九齡賦之以託意白居易刺忠州旣形於詩又圖而

序之雖髣髴顏色而甘滋之勝莫能著也洛陽取於
嶺南長安來於巴蜀雖曰鮮獻而傳置之速腐爛之
餘色香味之存者亡幾矣是生荔枝中國未始見之
也九齡居易雖見新實驗今之廣南州郡與夔梓之
閒所出大率早熟肌肉薄而味甘酸其精好者僅比
東閩之下等是二人者亦未始遇夫真荔枝者也閩
中惟四郡有之福州最多而興化軍最爲奇特泉漳
時亦知名列品雖高而寂寥無紀將尤異之物昔所
未有乎蓋亦有之而未始遇乎人也予家莆陽再臨

學海類編
泉福二郡十年往還道由鄉國每得其尤者命工寫
生萃集既多因而題目以爲倡始夫以一木之實生
於海瀕巖險之遠而能名徹上京外被夷狄重於當
世是亦有足貴者其於果品卓然第一然性畏高寒
不堪移殖而又道里遼絕曾不得班於盧橘江橙之
右少發光采此所以爲之嘆惜而不可不述也
荔枝才已龍眼始行殼黃瓢白核壯肉薄本草謂之荔
枝奴信然蓋荔枝飽啖之餘不堪咀嚼如膏梁子居
常醲臙一旦家落舖薄糜使不適口

紅柑福橘之次者也橄欖青澀能消酒止渴藥性賦所
謂泉州橄欖能消酒是矣本草一名諫果謂其始苦
澀而回甘猶忠言逆耳世亂乃思之也其俗取與子
薑和核搗碎醋拌充蔬

甘蔗幹小而長居民磨以煮糖泛海售焉其地爲稻利
薄蔗利厚往往有改稻田種蔗者故稻米益乏皆仰
給於浙直海販莅茲土者當設法禁之驟似不情惠
後甚溥

清源山茶青翠芳馨超軼天池之上南安縣英山茶精

者可亞虎邱惜所產不若清源之多也閩地氣暖桃李冬花故茶較吳中差早

紅梅百葉一花三子曰品字梅紫梗疏條非復霜皮鐵幹可偶

芙蓉有產於山者余廨後手插一枝未半載扶疏出牆名曰木芙蓉花最繁盛不下數百大如甌其色有朝紅暮白者此則粉紅一色耳

九節蘭花易植不若吳中所欽靜字中雖若棋列亦不甚香

余廨東所植茉莉其高及檐嘗於暑夜設木榻坐其下清芬郁烈可沾眉髮其地易生如吳中插槿也按本草時珍曰嵇含草木狀作末利洛陽名園記作抹厲佛經作末利王龜齡集作沒利洪邁集作末麗蓋末利本番語無正字隨人意會而已末利原出波斯國移植南海其性畏寒不宜中土弱莖繁枝綠葉團尖初夏開小白花重瓣無蕊花皆夜開丹鉛總錄曰晉書都人簪柰花卽今末利花也

西施舌殼似蛤而長外色若水蚌殼內色如孔翠肉白

似乳形酷肖舌闊約大指長及二寸味極鮮美無可與方舌本有數肉條如鬚然是其飲處

北方謂泥磚曰土坯晉江有介屬亦曰土坯綠殼白尾其旁有毛

草魚清脍頗險諸肴然其形酷似病痘小兒臂指所切不堪寓目

龍蝨如牛糞上蟲似黑而薄劈食之小有風味

鱉魚碧血海中介魚也似蟹足十有二長六七寸漁者醢其肉居人以其殼作水杓穆天子傳黑羊白血以

鱉况之則亦可信

蝦有長一二尺者名龍蝦肉實有味人家空其殼如船燈挂佛前

鬪魚大如指長二三寸花身紅尾善鬪人家豢畜之俗呼爲丁斑魚張世南遊宦紀聞云三山溪中產小魚里中兒豢之角勝爲博戲信然

牡礪麗石而生肉各爲房剖房取肉故曰蠣房泉無石灰燒蠣爲之堅白細膩經久不脫

蚶大而肥鮮美特異海物志名天鬪爾雅名魁陸本草

名瓦壟子雜俎云鼎俎之味有蚘醬

鼃一名石鱗魚紫斑如纈錦生溪澗高潔處其大如雞
得亦不易厥俗兼皮食之有見餉者余令人縱之野
中左右瞪眸不轉曰此難得之珍味也

泉州海錯品類最多余嘗欲就其所見記錄一帙以廣
好事會奔命未遑也五代陳致雍作記謂雍家於晉
安日觀海族日有多品而考其名實不同者則華人
之言異也是故荒餘之產職方不入郭璞未詳張華
不載沈瑩臨海記顏之推稽聖賦崔豹古今註交州

異物記嶺表錄異山海經東方異物等記及諸家博
物之例物同而名異者集在此卷就其方言而正之
曰海物異名記

泉南富家田不過五頃至十頃極矣爲山多而巨姓繁
耳土人藏穀不藏米爲易蛀也又米多石屑米戶應
官簸颺數四非經旬不得甚而婦女手擇之余每齧
石屑則默然勿令知不欲難其所難也

造白沙糖法用甘蔗汁煮黑糖烹煉成白劈鴨卵攪之
使渣滓上浮按老學庵筆記云聞人茂德言沙糖中

國本無之唐太宗時外國貢至問其使人此何物
云甘蔗煎用其法煎成外國等自此中國方有沙糖
茂德乃宋勅局勘定官余郡人也

蟻有數種能螫人廚中饌案以四木桶盛水灌案腳於
中夏雨夜入臥牀雖帷帳周密俱所不免多至一二
升最為寢食之害蓋蟻為溼熱相蒸所致故居宇須
疏風放水稍亦可除蟻尤能運土蝕木令棟易撓

二宮告成需石陳設滇中以奇石四十八塊
皆佳名標奇以進時歲己亥三月余給事水衡目覽

手抄附列篇左

春雲出谷 泰山喬嶽 神龍雲雨 天地交泰

各五大五尺一寸 玉韞山光 大五尺 河洛獻瑞 元嶂雲收

江漢朝宗 奇峰疊出 海山朝旭 各大四尺一寸 錦

雲碧漢 虹臨華渚 雪溪春水 羣峰獻秀 麟

趾呈祥 龍翔鳳舞 各大四尺 一碧萬頃 雪巖春

霽 雲霞海曙 各大三尺 萬山春曉 春山烟雨 百

川霖雨 各大三尺五寸 溪山烟靄 大三尺一寸 壽山福海

雲漢麗天 各大三尺六寸 湖光山色 函關紫氣 春山

烟雨 卿雲絢彩

雲霞海曙

雲霞出海

各三尺五分

龍飛碧漢

各四尺八寸

山水人物屏石八塊

山川

出雲

各三尺九寸五分

烟波春曉

大三尺四寸

白雪春融

大三尺

尺三寸

雲龍出海

槎泛斗牛

各三尺五寸

春雲出谷

海晏河清

振衣千仞

各二尺九寸

太守東山張公檄余盤德化縣倉穀盤少正額一千八百一石查出不入冊穀價銀二百九十三兩五錢又

司李李公檄余盤府倉穀盤少正額四百九十八石

夫各處倉穀缺額者多矣查盤止取倉收文具耳未

有倒厥籌較報欠數多如今日者有之白兩公所命

而余實始之蓋泉庾所儲晚稻也多擊則穀破少擊

則芒畱兩者皆可引蛀况漸以積之最易為末倉蠹

藉口甚有慢漁安得出陳易貯早稻使民髓不為消

竭也

東山公莅泉甫五月以簡惠得民心去郡日號泣遮畱

者數千人徒步會城乞畱不遂於是有吏欲自潤假

公旨令余追未完贖緩補庫余疑非公密白之公公

駭曰貧百姓愛我如此我反累之耶微公余言幾為

泉南雜志卷上

遊覽

遊覽

學海類編
三
遊覽
奸吏所蔽公亟示蠲之

泉俗最重堪輿雖以己地營葬鄰家必嚴不相容一日有宦裔黃生乞地於東山公公以其狀屬余曰黃司農昔在南曹司帑棄千金而不取致死無以爲殮今親歸四年猶貧無葬地清官安可爲乎所乞二山果閒曠或天畱以埋玉未可知也該司躬莅一勘庶賢大夫有馬鬣亦有司表墓之遺思也余往勘所乞之山緊迫三墳適當其卜三氏子孫所必爭非寢邱可比且巖阿峻折靈輿有崎嶇之危若臨穴鬪沮英魄

虛入土之安要須無競始利窀穸公然余言黃亦亟止少焉三氏之族百許人轟闐余廨余出成案視之乃謝而退

泉之東門外有官山周數里爲貧家葬瓦棺處葬如棋布無著腳地然而科第標木森立其閒者往往有之此豈當時重堪輿邀地脈者耶良由祖父無產可營於德無損子孫憑藉雖少外慕自絕惟知讀書自立故耳又聞之巨室至十餘年未葬其親者以爲難得善地旣葬而子孫日見式微此豈當時不重堪輿不

邀地脈者耶亦由祖父居積豐饒豆瓜自種子孫多財益過不復好修外釁相仍故耳余故曰能盡天理則地脈可邀泉山之標作善之報也

安溪縣伐一巨木充冊封琉球海船桅木藩臬檄余覆勘其責甚重余以民尺量長十丈一尺六寸頭圍一丈一尺至八丈五尺處圍三尺七寸九丈處圍二尺九寸復以官尺較定若於內斲去浮皮爲數益窄蓋桅尾不及三尺而望斗之下必連鑿數孔以繫桅挂風帆緯繚所繫甚重不知幾千鈞能任與否請從定

式已而聞用甯化一木其必大於此者先是安溪山中出一大木運至漳界一磕而斷余意必病木木理不堅致之耳不然千年巨材豈一磕可斷天若不令苟全于陸以貽危海上也者國命非常故木神効職如此

泉城火燭盛行市販苦于資養向緣法不究弊雖禁弗戢當事者謂坐臯須贓而不知燭銀在鑪炙手難獲適生搶奪厲階耳余乃辨傾紋傾燭兩種瓷罐迥然各異傾紋銀者直出鏽色而乾傾燭銀者光潤帶黃

而溼取罐比查奸可立見議出而人芟機種積尚頗
革火煨抵假銀也

鷺鷥洲田本海沙漲出因莖戶欺隱沒為學田民佃輸
賦以資膏燭頗為有力所侵幾致激變監司檄余監
獲以綏農人因思不日歸耕如淵明于下澗田舍獲
釋鑿詠歌翛然自適無復作風塵面目看人眉頰也
德化九仙山有瀑布泉自雲際下宋主簿柳驥詩有天
插一泉聲漱玉池高六月夜凝霜之句

余廨西甚饒隙地綜事之暇蓬首散帶率童僕種蔬於
中所姑有餘尚可分給貧隸息力樹下見清源山縈
烟斜照中如湘中別記所謂碧紗籠罩翠微蔚為佳
境因念我家仲子攜妻灌園陶淵明採菊東籬下悠
然見南山時於此俱可想見顧余事官鞅掌委形踟
躇然而時得二趣者聊欲覓閒情於勞鹿簡清事於
塵汙耳

清源山在郡北三里許高數千仞未至絕巘數百武有
泉自石罅流出積於砥石凹處甘冽獨勝他泉好事
者攀躋汲之冬夏不減其東有妙覺巖石上刻第一

山是米元章行書

南臺峭拔摩空在清源山之右臺南有砥石嘉靖十三年譚鎧以鄉舉司李泉州建思樂亭於其上鎧有惠政善聲律樂於山水閒戶部侍郎顧珀爲之記泉志鎧爲崇德人吾郡志爲桐鄉人

遂昌雜錄言慧光庵尼無著爲張循王九世女孫以陋故不嫁而挾嫁貲故優裕清源文獻姓氏言尼無著平江府資壽妙聰禪師爲丞相蘇頌女年三十許厭世浮休脫去緣飾咨參諸老余按二說不同因攷蘇

頌爲泉州同安人移徙潤州相哲宗龍圖閣學士紳之子也紳葬丹陽遂居焉丹陽去平江不遠則無著爲頌之女厭世無疑非陋而挾貲者不然王公貴家女苟非有道安肯以陋自退無著嘗有偈云一葉扁舟泛渺茫呈橈舞棹別宮商雲山海月都拋卻贏得莊周蝶夢長履素遺榮清空可誦挾貲者無此言

唐設泉州錄事參軍事一人掌政違失泣符印目功參軍事一人掌租調官廨庖廚倉庫司戶參軍事二人掌戶籍計帳道路過所蠲符雜徭逋負良賤芻藁逆

學海類編 卷之二 遊覽
旅婚姻田訟旌別孝弟司田參軍事一人掌園宅口
分永業及蔭田司兵參軍事一人掌武官選兵甲器
仗門禁管鑰軍防烽埃傳驛田獵司法參軍事二人
掌鞠獄麗法督盜賊知贓賄沒入司士參軍事一人
掌津梁舟車宅舍工執參軍事四人掌出使導贊宋
設諸曹錄事參軍一員掌州院庶務糾諸曹稽違司
戶參軍一員掌戶籍賦役倉庫納受司法參軍一員
掌議法斷刑司理參軍一員掌獄訟鞠勘之事元則
以推官二員專治刑獄而以諸參軍爲經歷知事照

磨各一員提控案牘一員明因之經歷掌文書出入
知事佐經歷理司事照磨主磨勘照刷設檢校佐照
磨理所事而權日以微提控案牘則又屬之藩司矣
泉志言宋眞覺大師名添志姓陳氏永春人故通直瑛
伯兄也初住南安雲華巖後遊京師元祐元年奉陳
太后懿旨詔入內祝遂甯王壽勅賜衲袈裟金環條
鈎哲宗御書云遂甯王陳美人願福壽延長施長者
眞覺當來同感佛果續賜制劄逐歲度僧天下名山
福地永遠居住初在福禪次住秀州福巖著作佐郎

黃庭堅嘗贈之詩云蒲團木榻付禪翁茶鼎熏鑪與
客同萬戶參差寫明月一家寥落共清風又贊云石
出山而韻自邱壑松不枯而骨立冰霜今得雲門柱
板打破鬼窟靈牀其石也將能萬里出雲雨其松也
故與三界作陰涼此似昔人非昔人山中故友任商
量刑部侍郎陳軒亦嘗贈之詩云車輪馬足走風烟
競看成都萬炬然獨我踏開庭下雪伴師同坐一庵
禪黃庭堅嘗爲作蓮花銘又書草庵歌贈之銘南安
有碑歌刻廬山歸宗寺余按福嚴寺屬吾郡崇德縣
郡志云徽宗在潛邸時陳太后病適真覺在京呪水
治疾有功許其住持名山真覺乞來此賜金環磨衲
袈裟又嘉郡柳志言師有草庵歌黃山谷爲之書俱
與前說異而略故竝書以備互攷

出仁風門半里許爲靈山其上有磐石可坐百餘人中
一圓石下不聯屬勢重萬鈞一夫撼之輒動搖不止
其勢就下若將彈丸走坂然然而百夫撼之雖動不
移也郡守周道光題爲碧玉毬又惠安縣有雲峰上
有大石高廣四丈許又有一石上廣下削高丈餘架

於其上恆有落勢併力推之不動以芥挺之輒動故名曰危石二石之異若一轍焉

南安姜相峰唐相姜公輔謫爲泉州別駕恆居此峰石上刻姜相峰三大字是宋魏公蘇紳書

高士峰在南安是唐校書郎秦系隱處有石刻高士峰三字隸書旁有才翁二字按志謂蘇才翁爲漕使嘗行部至泉題晉江棲眞院壁疑此字乃蘇書也

雄山在南安其上有飛瓦巖相傳昔有僧結庵其上因山伐木但患山高運瓦之難積瓦山下誑欲作法飛

瓦砌屋不用工師卜日已定遠近觀者數千人僧僞傭人挑瓦上山觀者欲其速於作法爭爲搬運頃刻都盡僧笑曰吾飛瓦只如是耳或謂之智僧余曰此詭梵然亦可與語權者

金石峰屬南安上有疊石其赤痕類丹書有石刻金石峰三字

泉之山莫多於西南高絕者莫儷於船山羣峰列秀此山獨出於其上勢若一船泉人加以福字故名福船山

韓昌黎言閩人登進士自歐陽詹始故知詹進士第不
但始泉州亦爲八閩破天荒也

萬首唐人絕句中於吾郡及泉州有未收者余錄其詩
于左以備補遺

答陸灋

張九齡曲江人

松葉堪爲酒春來釀幾多不辭山路遠踏雪也相過

見嘉興府柳志

張建封大夫秦系爲校書郎因寄此詩

秦系會稽人隱南安九日山

久是烟霞客潭深釣得魚不知芸閣上遺校幾多書

十三歲戲答清源牧

陳黯南安人

玳瑁應難比斑犀定不加天嫌未端正滿面與裝花

壺公山

井色斜連北蓬闕直倚東秋高巖溜白日上海波紅

以上俱見清源文獻

南安夕陽山真寂寺題詩

宣宗皇帝居邸時遁于此

惟愛禪林秋月空誰能歸去宿龍宮夜深聞法餐甘

露喜在蓮花法界中

見泉州府志

樂津店北陂

歐陽詹 晉江人

嬋娟有麗玉如也美笑當予繫予馬羅幃碧簟豈相容行到山頭憶山下

出蜀門

北客今朝出蜀門
翛然領得入時魂
遊人莫道歸來易
三不曾聞古老言

題第五司戶侍御

曾稱野鶴比羣公
忽作長松向府中
驄馬不騎人不

識冷然三尺別生風

建溪行待陳詡

偕行那得會心期
先者貪前後者遲
空憶麗詞能狀物
每看奇異但相思

以上俱見歐陽文集

戴雲山

智亮 廬于泉州德化縣戴雲山

戴雲山頂白雲齊
登頂方知世界低
異草奇花人不識
一池分作九條溪

見德化縣志

戴雲山吟

人間漫說上天梯
上萬千迴總是迷
曾是老人巖上

坐清風明月與心齊

荅泉州薛播使君重陽日贈酒

秦系 見前

強欲登高無力也籬邊黃菊為誰開
共知不是潯陽郡那得王宏送酒來

瀑布泉與唐宣宗皇帝聯句 黃檗禪師

千巖萬壑不辭勞遠看方知出處高
師溪澗豈能留

得住終歸大海作波濤
宣宗 以上俱見清原文獻 庚溪詩話云唐宣宗微時武

宗忌之遁跡為僧遊方同安夕陽山黃檗禪師與觀
瀑聯句

泉郡志云東出海門舟行二日程曰澎湖嶼在巨浸中

環島三十六如排衙然昔人多僑寓其上苦茅為廬

推年大者為長不蓄妻女耕漁為業牧牛羊散食山

谷閒各斨耳為記訟者取決於晉江縣城外貿易歲

數十艘為泉之外府後屢以倭患墟其地或云抗于

縣官故墟之今鄉落屋址尚存唐施肩吾島夷行云

腥臊海邊多鬼市島夷居處無鄉里黑皮年少學採

珠手把生犀照鹹水即其處也今澎湖已設遊兵汛

守焉

學海類編 卷之三
遊覽
泉州市舶稅課云香之所產以占城賓達儂爲上沈香
在三佛齊名藥沈真臘名香沈實則皆不及占城渤
泥有梅花腦金腳腦又有水札腦登流眉有薔薇水
占城賓達儂三佛齊真臘渤泥登流眉皆諸番名
泉州志天順七年會闈大火焚死千餘人上憐之賜死
者俱進士余意千餘人中亦必有供事人員恐未可
謂俱賜進士因查弇山堂別集科試考是年癸未會
試舉人死于火者九十餘人主試官俱越牆免事聞
贈死者俱進士出身然則舍舉人外其他九百餘人

乃供事員役明矣又按名世類苑是年羅文毅公亦
在闈中賴謝大詔出之公有詩寄大詔云曾同丙子
看鄉榜丙戌春闈又在門南省再逢真父母西湖歸
老任乾坤庚己編則云一峰先生遭回祿垣上一老
人以杖提而出時捐軀者幾二千人而先生獲免出
招老人竟無所得愚謂垣上老人或卽大詔被災人
數亦各舉大槩故不同耳

泉之南三十里曰石龜峻壁上有石二丈許形酷似龜
行旅望之遠近無異吾郡宋太守岳公珂所著程史

云余外家居泉之石龜卽其處也

有亡賴王三壞柵越渡抱關邱斗五執之法也然斗五乘酒毆王三幾斃三之兄赴府告邱斗仔斗五兄弟共毆屬余拘訊皆白誓讀書子也其兄斗仔毅然自認斗五曰毆三我也何與兄事余壯其義以傷者界曰好護之辜限外可無抵于是斗五家悉力調理乃不死此弟兄重義輕死吾故識之以愧夫因資財而鬪于牆者

泉南雜誌卷下

明 樵李陳懋仁無功著

清源山一名泉山漢書朱買臣言東越王居保泉山一人守險千夫不得上今聞東越王更徙處南行去泉山五百里居大澤中今發兵浮海直指泉山陳舟列兵席卷南行乃可破也師古注泉山卽泉州之山保者保守之以自固也泉州府志非其注云自師古時言乃唐貞觀初之泉州今福州也又謂北山之巔乃東甌王避漢兵處然東甌王卽東越王餘善爲漢兵

所攻自所保之泉山南行徙大澤中繇王居股殺以
降漢亦無由至此山也余按買臣聞東越王更徙處
南行去泉山居大澤以爲易擊故請發兵浮海直抵
泉山上拜買臣會稽太守居歲餘與橫海將軍韓說
等始擊破東越是漢兵未攻之歲餘前而餘善已先
去泉山居大澤矣志謂餘善爲漢兵所攻而後去亦
非也又按閩粵王傳故粵衍侯吳陽反攻粵軍於漢
陽及故粵建成侯敖與繇王居股謀俱殺餘善以其
眾降橫海軍所謂漢陽則又非泉山矣余登泉山及

巔五里梯磴頗夷不爲峻峭卽有險可守然皆側徑
細路不能儲餉四面平疇困可立敝若陵谷已變遷
則已如未變遷吾意餘善欲保守自固必不居此絕
地是知非買臣所指之山明甚志雖表其非是然略
而未備且有先攻後徙之舛余故申其說以俟考焉
宋顯謨閣學士泉人傅伯成狀前嘉興守程公行實其
略云公諱卓字從元徽休甯人開禧二年除司農寺
丞十二月以親老抗疏請外補差知嘉興府丁母新
安郡夫人艱嘉定三年八月服闋以嘉興治最授朝

奉郎歷官正議大夫同知樞密院事致仕新安郡開
國侯贈特進資政殿大學士又云樵李輔郡公以推
擇出守剖決如流莫不切中其情然終歸平恕或僞
爲倅廳印紙與奸民爲市以充契券之用流布旣廣
吏因事覺視爲奇貨謂無真僞當歷加追驗則所得
可裨郡計不少公曰此不過僞造者罪耳若一一驗
之編民竝擾吾以安民爲先利非所急也乃喻民有
誤買者許自陳立與換印陳者畢至一郡晏然尋以
內艱解郡按此則知公之澤被吾嘉甚厚乃吾郡志

自元郡幕單慶學博徐碩及明太守柳公遺公之名
與事之實後遂泯泯余讀清源文獻漫爲錄出以備
補遺

泉自五代之際腴田多屬寺觀民間其下者耳厥後漸
爲勢佃轉相沈匿寺觀反累虛糧至今數百年來尙
有清查寺田找價爲充餉之用者余嘗奉差稽覈溷
不可了朱紫陽簿同安日有詩云輸盡王租生理微
老僧行乞暮還歸空山日落無鐘鼓惟有虛堂蝙蝠
飛是知僧寺糧累而貧宋時已然矣

唐盛均泉人也嘗病白孔六帖疏略廣爲盛氏十二帖
宋鍾璇亦作續白孔帖

泊宅編載泉州萬安渡水闊五里蔡襄造石橋兩岸依山非也余嘗往來此橋及按端明自爲記長三百六十尺非五里岸左面山非依山岸右則去山尙遠也
宋德祐二年十二月蒲壽庚反知泉州田真子以城降子元考泉州府志田真子晉江人文文山同榜進士爲州司馬蒲壽庚其先西域人與兄壽宥總諸番互市因徙于泉以平海寇得官壽庚頑暴寡謀壽宥爲

之畫策密畀壽庚以蠟丸裹表潛出降元今但知壽庚之叛宋而不知壽宥之主謀也其子師文尤暴悍嗜殺孫勝夫其黨也余按宋元通鑑云我太祖皇帝禁泉人蒲壽庚孫勝夫之子不得齒於士蓋治其先世導元傾宋之罪故終夷之也又資治通鑑府志俱曰田真子而薛方山宋元通鑑則曰田子真兩通鑑俱稱田知泉州而府志則稱田爲州司馬名與官皆屬互異故并識之不致賊臣溷逃斧鉞也

衛民祠爲前守熊公設也公諱尙初江西南昌人由吏

員正統末知泉州剛梗廉勤有善政時鄧茂七反據汀延遣劇寇侵掠泉界民甚危之郡將王指揮觀望不武公曰吾當躬禦不可延寇殲吾城請師未下乃提民兵與晉江簿史孟常陰陽正術楊仕洪拒戰于古陵坡皆爲賊所執欲屈之公執不可迫取贖又不可公氣愈厲罵愈甚遂皆死之繼而重兵至賊走後錄其死事祠以祀之以楊史配萬歷己巳太守東山張公見其祠傾圮立欲新之命余董厥事甫庀材鳩工有庠生某以其父有近時說賊功欲塑像史楊之

次余曰有勞桑梓與死事竝祀固與禮合但須論定當事議許而後可會公解組去後無任事者祠尙頽然蓋熊公以吏起至二千石爲民死賊城得保全血食千秋神爽赫弈誰謂掾吏無人哉公之外又有羅明以劍州判罵賊死曾璉以連州判禦賊死鄧俊以榮山尉禦賊死陳一道以蕪湖丞禦倭死俱蒙恩蔭且立祠焉嗟嗟此數君者甘殺身以成仁不求生以害義故能心堅鐵石操厲松竹履危亡而不顧飲刀斧其如飴是知蹈節捐軀不限人地彼紆朱鳴玉者

學海類編 五 遊覽
視死在前而欲成此徽烈幾何人哉

國朝掾吏不但熊况兩公官太守俱稱名臣其尙書侍

郎卿寺銓司台省藩臬二千石府佐縣令不下數十

百人無論各省多有卽以泉與吾郡可指而數者泉

州有張苗南通政使張暉光祿少卿劉仲修工部主事黃均知縣趙應

實知縣加六品黃永甯波湖州廣信三府知府嘉興有殷昶監察御史陳宣

河東運使張翊大理評事顧琛吏部郎中葉春刑部右侍郎張振重慶知府金

宗禮部郎中以上俱互見弇州別集泉嘉兩郡志雖進取

或有超資要亦有可用者在故知國家未嘗不用異

特患頽靡不肯自立苟有自立者出而不爲羣妒所

射者少矣且當事者不但不爲振拔反疑而伺察之

使舍沙得行蘭菴共刈是非所以激有志以勸後來

也

東嶽行宮坊扁曰萬山第一是米元章書第一山刻妙

覺巖下者相傳一羽士臨出自書萬字足之

余有米南宮寶藏二字刻于無爲州者徑二尺許大有

神勢欲摹刻清源山中客有謂余曰院司且經遊公

位下未宜勒石余乃笑而止

學海類編 卷之三 六 遊覽
庫貯敗鐵甚夥皆先後所收不堪軍器也余嘗監收目擊可用乃兵子飾虛利在掙餉不論堪否故毀解還余議堪者官給工料分發各營修理兼用不堪者作鐵與之於軍器銀內銀七器三照額搭給解驗查盤一加新造之法併散雨溼火藥而加礮提之計省二千餘金卽於餉銀內扣庫以抵下年額征節軍費以紓民力計無便此沈都闢士宏力贊如余言郡司馬楊公司理李公欣然覆議各以陞任丁艱行視篆汪公因議具申乃當事者泛視不行終作朽物惜哉

興化有海洋劇寇數輩俱寘典常惟賊首杜某尙在逋逃乃興化海防同郡夏靖原公所部事也中丞御史臺嚴限不獲一日公密札示余曰此巨寇也幸加意緝之余始物色其人饒於資善航海又多黨與非計得不可乃屬意謀者曰幕君與夏多桑梓情能爲爾地來吾爲若屬幕君圖之否則終爲他擒無脫理爾卽走海如妻子家產何杜然其言果至余乃縛送科結初公之緝此賊久屬余最後偶然耳不虞余得之如吹塵也乃知作惡者終不能逃法網耳

學海類編 卷之二
七
通覽
余司干擻一青衿失盜稱明火強盜劫錢物數百金在
事賊曰城中盜至此極乎切責余往勘盜蹤至則見
一閒矮屋門有火炙一孔若將伸指探屜屨者余不
問所失第檢所存有竹竈一竈傍匡牀一綻布被一
舊履一量盃筯數器依牀一桌而已余卽以開覆在
事吒而遣之余問青衿曰公此舉何居青衿答曰賊
雖無所得然生旣貧反得所司例守暴客故作此鬧
事聊欲給其比追耳

城中一夕被盜捕兵實爲之招直巡兩兵一以左腕一

以胸次俱帶黑傷而不腫裂謂賊棍毆意在抵飾當
事辭責司捕之弛於干擻也甚厲余意棍毆處未有
不致命且折亦未有不腫且裂者無之是必贗作問
諸左右曰吾鄉有草可作傷色者爾泉地云何答曰
此名千里急余令取搗碎以二人塗如其處少焉成
黑以示兩兵兩兵愕然遂得奸狀自是嚮道絕而外
客無所容矣按本草千里急一名千里及藤生道傍
籬落閒葉細而厚味苦平小有毒治疫氣結黃瘡蟲
毒煮汁服取吐下亦搗爛敷蛇犬咬不入眾藥第不

學海類編 卷之三
載此草可染膚黑如鳳仙花可染指紅也

葉湜爲泉州惠安丞真文忠公守泉時引以自助有擒賊功甚著公爲作墓誌郡志失其名何也蓋未見西山文集耳

宋進士呂造詩云閩海雲霞遶刺桐往年城郭爲誰封鷓鴣啼困悲前事豆蔻香銷滅舊容刺桐城今泉州築城時環城皆植刺桐故號桐城

宋王勺泊宅編云七閩地狹瘠而水源淺遠墾山壟爲田層起如階級然每引谿谷水灌溉中塗必爲之磴

下爲磴米亦能播精朱行中知泉州有水無一滴不爲用山到崔嵬盡力耕之詩蓋紀實也余曰否蓋余於泉嘗履畝焉聽斷中多有爭水者其田謂之糞水田以水源遠近爲價之高下如吳中上鄉下鄉然港脈鮮少源流僅是一溝或積一潭各從其派非共由者不得盜決支流田傍各濬土坑蓄水遇旱置桔槔引灌夜則守之以防盜汲朱行中所云水無一滴不爲用蓋在此不在磴春也余所經浙之金衢達建安始有水磴田開山壟閩實爲多故余詩有湍中纍石

開泉磴天半鋤雲種水田之句又泉志郡守無朱行
中元祐閒有朱服改知婺州婺州卽三國時東陽也
泊宅編謂朱行中嘗守東陽故知行中或卽朱服字
也

宋陳復齋必知泉屬安溪時各色錢不係上供例歸縣
官吏以例進公曰入縣卽爲官錢私有之則贓也良
久曰此一例字壞了許多賢士大夫

泉南號文章之藪而載籍甚少何也所見者惟歐陽行
周文集真西山忠經清源文獻泉郡志敬由編王梅

溪真西山公溫陵畱墨蔡文莊公集王遵巖先生集
此外無聞焉或曰藏書家祕而不行耳何忤菴先生
曰蒲氏之變泉郡槩遭兵火無復遺者又僻在一隅
傳播不廣習尙纖嗇梓刻不多地氣卑溼蠹魚爲虐
慨前人之苦心悲後世之漸滅故公集清源文獻以
表前人而引用諸書皆出家藏也

有一婦因夫出賈便告離夫屬余鞠之余意買臣婦離
夫謂其終餓死溝中故也經商非貧離之必有姦事
陰遣人門外覘之果得姦夫論詞科斷

學海類編 卷下
余幕佐王君者以細故瞋相余以釋提婆那與佛問答
二偈解之其問偈云何物殺安樂何物殺無憂何物
毒之根吞滅一切善佛答偈云殺瞋則安樂殺瞋則
無憂瞋爲毒之根瞋滅一切善王君爲之改容雖然
悔失攻中而怒不可拔矣

泉濱海颶風時作客因曰此非雄風乎然不聞有謂雌
風者余同僚山陰俞君善謔曰今內孺威作非雌風
乎余笑曰雖然風亦有相偶者宋玉賦有大王風劉
孝威詩有少女風風俗通有君子風北史有小人風

優童媚趣者不吝高價豪奢家攘而有之蟬鬢傅粉日
以爲常然皆土腔不曉所謂余常戲譯之而不存也
先是一彪黨舉此以爲傷敗風俗建白當事據行之
然而此種蓄於有力家雖禁弗戢第長彪黨之風則
曰吾言足以取信當事從而伺察人過動欲檢舉設
機嚇詐卑官黔細爲之不安余雖白府竟不我信已
而果驗余言故凡建白頭出更老要亦事可施行假
公濟私所當深察也

迎神賽會莫盛於泉游閒子弟每遇神聖誕期以方丈

木板搭成擡案索綯綺繒周翼扶攔置几於中加幔於上而以姣童妝扮故事衣以飛綃設以古玩如大士手提篋筥之屬悉以金珠爲之旗鼓雜沓貴賤混并不但靡費錢物恆有鬪奇角勝之禍至於宵分鼓死寂然無聲便是人消物化境界富貴下場榜樣矣雲間徐子丞贊晉江嘗問余曰律例果皆鄮侯作耶余曰漢高祖法三章蕭何增爲九章叔孫通又增爲十八篇文帝除肉刑景帝減笞數武帝律令凡三百五十九章大辟四百九條千八百八十二事後世增刪

不一我明附例居多凡遣戍則引例非律也漢景帝時笞者箠長五尺其本大一寸其竹也末薄半寸皆平其節當笞者笞臀毋得更人畢一罪乃更人然此代斬趾代截鼻非施之罪外者也後世用竹爲刑具始于此不但施之罪外甚則五下一更人笞臀去遠至於胯不曰笞而曰打矣古之五刑一曰墨鑿其面以墨涅之二曰劓截鼻也三曰宮淫刑也男子割勢婦人幽閉四曰剕斷足也五曰殺死刑也今之五刑一曰笞用小荆杖決打一十至五十每一十爲加減

學海類編
一
遊覽
一等二曰杖用大荆杖決打六十至一百加減等如上三曰徒拘收在官以應用力辛苦之事一年至三年爲五等半年爲一等酌罪輕重而加減之四曰流既流去遠方終身不得還鄉二千里至三千里爲三等五百里爲一等酌罪輕重而加減之五曰死絞斬也絞全其肢體斬首身異處凌遲極刑也

丙午旱魃爲虐米價騰貴兼一時私錢盛行卽官錢驟亦不用議者欲減價平糴併禁私錢百姓嗷嗷至于罷市余白府曰泉地米少不比米多處可以定價今

所籍以裕地方者全在海商若一減價商必走他趣厚利泉雖多財如米之不至何故宜一聽市值俾海商聞之俱來米既集而價未有不平者若私錢新鑄也火色未純與官錢異第緝治以私鑄之舉則官錢自復府然余言不浹旬而海米來集其價遂平錢亦復故

丙午夏旱署府別駕舉繁露之儀禱而月而土益焦說者謂南門宜禁不爲通者浹旬百姓皇皇絕於水火余曰南門閉則宜雨閉久不雨則非南門之故何徒

苦百姓爲當事始啓門數日雨

余方輯雨異一書閱泉志至正十三年七月雨白絲書投簾中如得至寶

宋曾公亮晉江人少客京邸有鄰生泣悲甚問故生歛歛久之乃曰僕因事負官錢貧無以償僅一女鬻商人四十萬貸官行有日故泣耳公曰商人轉徙不常孰若售之我平生喜卽如數與錢約後三日以其女來吾且登舟以俟生如期往公解維已三日矣公歷官顯要以太保致仕卒年八十贈太師中書令諡宣

靖配享英宗廟庭及葬御篆其碑首曰兩朝顧命定策亞勲之碑

薛天華字君確晉江人其居鄉左戒云母通要路書以務養節則俯仰不瀆母豫塵紛事以務養寂則內外不擾母殉末俗態以務養高則志行不羞母受非禮餽以務養廉則彼已不失母妄結賓從以務養交則戚黨不棄而善彙集母苟出言語以務養德則靜噪不爽而口過息母逐戀嗜好以務養神則天倪不伐而和氣全母厭薄遲鈍以務養量則機心不熾而真

性得毋譏訕世短以務養福則不忤人以見直而鬼
責消毋虛邀時譽以務養誠則不怨己以見賢而潛
德進毋妒疾雋能以務養才則不設阱以誣善而有
獎藉之功毋歆羨汰靡以務養嗇則不競侈以蠹俗
而有由禮之漸公 世廟時官方伯講學勵行以清
白稱

蘇隨晉江人嘉祐二年進士令博羅棄官歸號紫雲先
生葆神鍊氣不與俗接一夕夢遊異境覺而賦詩曰
夢乘鸞鶴到仙家侍女風流魏月華琥珀盞斟千歲

酒琉璃瓶種四時花金函藏籙文刊玉石壁題名篆
點砂一枕北窗初睡覺日移門外柳陰斜後數年端
坐而逝

唐僧無等會稽人居南安延福寺盧刺史三請不至遣
使仗劍云不下山取頭來無等曰身非我有况頭邪
禪寂自若盧嘆曰空生之道一至是乎

宋魏國夫人陳氏晉江人龍圖從易之女內翰蘇紳之
妻丞相頌之母三公皆嘗爲杭守陳題杭郡舍柱云
吾少從吾父至此邦中與吾夫偕來今同吾兒凡三

到盡閱江山之勝

歐陽公詹初發太原途中寄所思詩有云高城不可見
况復城中人以此得函髻之謗何忤菴先生曰此樂
府體黃璞乃謂公悅太原一妓卒以殞身好事傳之
不信韓退之李習之李貽孫信璞何哉余按公詩有
太原呈薛侍御齊奉禮和嚴長官登太原龍興閣陪
太原鄭中丞登汾上閣上太原李尚書是皆所謂城
中人也故結句云流萍與繫匏早晚期相親流萍喻
聚散繫匏公自喻若思妓則安用繫匏且太原妓函

髻詩起云自從別後減容光此乃鶯鶯句剽竊傅會
其誣益見矣

張襄惠公巡撫江西時奉詔建嚴內閣迎恩樓有司重
復以請公曰供費如式寔奉明旨批卻之又夏內閣
築生墳使司議廣信七縣每縣措夫價一千金公曰
範金爲槲乎每縣百金足矣夏謝曰愛人以德者固
當如此

宋鄭俠福清人官司法參軍會大旱民流繪圖上神宗
致迂羣奸徙英州元祐初東坡孫覺薦起爲泉州教

授

韓國華守泉州祥符元年戊申七月二日生魏公於泉州州宅世言魏公居河朔故其狀貌奇偉而有厚重之德見嬾真子

王文正公會本泉州人八歲徙青州益都 本朝邱文莊公其祖亦晉江人爲小官於瓊州因家焉

吳中人物志云元陳寶生母莊氏海鹽人其父韓思恭泉州大商贅于莊一年生寶生甫四月恭去商海上久以爲死莊誓不嫁後恭還及五年又浮海去遽溺

死莊益守志恭有前娶生子曰寶一在外家莊曰彼所生與吾所乳均出吾子乃質田與之養恭又嘗假貸友人五十緡友人至是負官錢繫獄莊曰不可死有所負也傾橐償之寶生與寶一爲兄弟如同胞寶一死寶生爲育其孤女是知莊善教之有素也寶生長好文與縉紳大夫游乞言表揚母節嘗築春草堂奉母于太倉里第余按嘉興府志海鹽縣舊志徐一夔贊序樂郊私語俱以莊爲泉人陳爲鹽人以商至泉贅焉府志又言莊攜其孤歸海鹽莊以壽終高季

迪作詩美之則恭爲泉人似無疑然三書俱不載莊
之償貸及質田養前妻子與寶生育孤三事樂郊私
語又言黃公望子久拉彥廉寶生字觀濤陳泣日陽侯
父仇也何忍以怒眼相見子久爲之動容不看而返
因作仇海賦以記其事其觀濤事人物志亦不載故
竝錄出

科第之盛莫盛於泉如嘉靖戊午鄉舉中三十五人辛
酉甲子各三十四人近科有及五十人者若嘉靖甲
辰科入試舉人八十餘人俱下第此又一時盛衰之

異也

眞文忠公於嘉定紹定閒兩知泉州余讀公集有登金
山詩云江來朱方注之東海潮怒飛日夕相撞春天
將古來義士骨化作狂瀾中央屹立之青峰孤根直
下二千尺動影裊窕冲融中黃金側布蘭若地鑿翠
面面開窗櫳雙橈伊軋破浪屋恍忽置我高巖從是
時千山雪新霽水而月出天清空濤聲四起人籟寂
毛髮蕭爽琉璃宮披衣明發躡煙靄決背俯入歸飛
鴻襟前渤澥斂暝色袖裏岷峨吹曉風越南燕北但

學海類編 卷之三
一氣塵埃野馬何時窮蒼梧虞舜不可叫王事更恨
歸怱怱正德閒鎮江推官史魯修京口三山志不載
此詩公之詩至於遺漏可知矣

歐陽公曰晚唐詩人無復李杜豪放之格然亦務以精
意相高如周朴作詩構思尤艱極其彫琢故時人稱
朴詩月鍛季鍊未及成篇已播人口余攷朴吳人隱
泉州安溪余有事過縣經永安里周塘卽其隱處後
徙福州黃巢攻城得朴曰能從我乎對曰我尙不仕
天子安能從賊巢怒殺之湧白膏起數尺

布衣黃孔昭泉州惠安人何忤菴先生曰孔昭詩如入
幽林長薄其樹木皆世所有而鬱然蒼翳遂覺老蒼
歷下琅琊所稱盧謝未之或先

何茂先晉江布衣也陳爾身曰予讀人之文多矣至觀
茂先之作多撫几流涕蓋其孝弟之言動人殊深
泉人蔡元偉云孤舟孤燈聖賢爲侶真有一日似兩日
氣象

泉南布衣陳建勳年在耆老性好吟咏執操貞厲居貧
若康嘗從何儀部研精墳典於歐陽行周讀書處超

然絕迹可謂挺孤節於靡枝激清風於頽俗者矣
宋司農卿湖廣總領詹體仁淳熙閒嘗爲泉州晉江丞
程尙書大昌司馬侍郎及相繼爲守尤加賞異待以
賓禮郡有疑獄必諮焉嘗提舉浙西常年謂浙右之
有漕渠非止通餽運資國信往來而已蘇秀常潤田
之高仰者實賴之於是開漕渠濬練湖置斗門爲旱
澇備真西山爲公作行狀公於泉郡有善政於吾郡
有開渠功泉志失之余爲錄出

守令庶屬雖有崇卑而官制悉志之者昭臣服徵淑惹
也閒有遺落或承前闕爰採泉與吾嘉兩郡人官是
邦者錄于左方以補未備其已志而并錄之者便類
考也

泉郡人官吾嘉者自藩臬外有

林曠

晉江人正統十年任桐鄉令見嘉志

林旺

安溪人歲貢正統閒任秀水丞見泉志

林敏

惠安人歲貢景泰閒任嘉興丞見泉志

蘇疇

安溪人歲貢天順閒任海鹽訓見泉志

盧昭

惠安人歲貢天順閒任嘉興稅課大使見泉志

饒恕

晉江人監生成化十二年任桐鄉訓見嘉柳志

汪順

同安人吏員成化間任崇德丞互見兩郡志

蕭韶

宏治癸丑任海鹽諭見嘉志 泉志作博羅訓

林秀

晉江人歲貢正德間任桐鄉訓見泉志

連桂

惠安人歲貢正德間任海鹽諭見泉志

洪熊

南安人舉人正德八年任平湖訓互見兩郡志

曾仲魁

晉江人嘉靖二年進士給事中陞嘉興池州知府見泉志嘉志闕或未任

徐榮

晉江人進士嘉靖癸巳任嘉善知縣互見兩郡志

溫學舜

晉江人進士靖乙未任桐鄉令

李漢

安溪人歲貢嘉靖間任桐鄉訓見泉志

陳道基

同安人進士嘉靖庚戌任嘉善令互見兩郡志

田相

泉人秀水典史

王用中

泉人秀水簿

鍾信

泉人王江涇巡檢以上俱嘉靖間任見海鹽舊志

蔡民望

晉江人舉人隆慶庚午任嘉興同知見嘉志

史朝鉉

晉江人進士隆慶己巳任嘉善令互見兩郡志

蔡貴易

同安人進士隆慶壬申任崇德令互見兩郡志

胡世華

晉人杉青閘巡檢

駱世元

晉江人杉青閘巡檢

王三陽

晉江人進士萬歷辛巳任嘉善令互見嘉志履歷

蔡彭

晉江人進士萬歷甲申任嘉善令互見嘉志履歷

薛喬登

晉江人萬歷丙戌任桐鄉令見嘉志

謝吉卿

晉江人進士萬歷己丑任海鹽令見嘉志履歷

林夢琦

晉江人進士萬歷己亥任平湖令互見嘉志履歷

郭日彊

晉江人萬歷甲午任嘉興簿

余嘉郡人官泉者自藩臬外有

劉昌

海鹽人選貢洪武閒任泉州訓見嘉志泉志闕

許珣

海鹽人舉人正統閒任安溪令見海鹽舊志嘉志作訓導泉志闕

徐忠

海鹽人歲貢景泰閒任泉州經歷見嘉志海鹽舊志泉志闕

王輔

崇德人歲貢天順七年任泉州訓互見兩郡志

周密

海鹽人吏員天順閒任安溪典史互見兩郡志

鄭恂

海鹽人吏員天順閒任晉江巡檢見海鹽舊志

汪順

嘉興人選貢成化閒任泉州訓見泉志嘉志作汪頤

王浩

平湖人歲貢成化五年任南安簿見嘉志泉志作湖州人

顧旭

嘉善人成化二十一年任永春典史見泉志

周家顯

海鹽人吏員成化閒任泉州巡檢見海鹽舊志

沈慶 嘉興人監生宏治九年任惠安簿見泉志

夏雄 歲貢任晉江訓導見嘉郡柳志

王箴 嘉興人正德九年任泉志作泉州訓 嘉志作教諭

沈鑰 平湖人嘉靖五年任惠安訓見泉志

譚鎧 崇德人舉人嘉靖九年任泉州推官見泉志 嘉志作桐鄉人

吳元 海鹽人監生嘉靖十年任南安簿見泉志

孟鍾 嘉興人吏員嘉靖十三年任惠安簿見泉志

俞咨伯 平湖人進士嘉靖十九年任泉州知府見泉志 嘉志官提學副使

仇俊卿 海鹽人舉人嘉靖二十九年任惠安令見泉志 嘉志作博士

支大綸 嘉善人進士萬歷閒任泉州推官 以下俱泉修志後任

金枝 崇德人進士萬歷閒任同安令

李在公 嘉興人進士萬歷閒任同安令

夏建寅 秀水人舉人萬歷閒任惠安令

陸鼇來 海鹽人舉人萬歷三十年任泉州通判以上互見嘉興志歷科履歷

與余一時共事者有費和 海鹽人吏員萬歷三十一年任南安典史

姚宗垚 秀水人吏員萬歷三十一張化龍 嘉興人吏員萬歷三十一

十一年任同安 朱垚 嘉興人吏員萬歷三不佞懋仁

則泉州經歷也

泉州朝天樓考志自唐貞元九年郡牧席相修後無有繼者四門博士歐陽詹序云倚層霄於軒檻納千里乎窗牖此郡北牖之立候樓也萬歷乙巳冬余董城工見其歲久傾仄居人兢兢焉虞有拉攏之患余亦念圯而後新則爲費鉅故欲易五六朽柱而正之不費官帑不煩民力止取於余所董城工之羨緡中經月可竣議白道府屬余經紀其事甫庀材而異議鼎沸有謂關於文風者有謂關於火災者又謂非千金非經歲不訖工者甚而曰有巨室重堪輿言賄匠易

制者余曰樓有二十四柱僅換六柱而舊制移如眾柱何監司句餘陳公司李故鄣李公拂羣議是余言咸出薪俸助工於是議者不能難是歲十一月二十六日興工十二月二十五日安獸所費才一百有兩訖工僅三十一日耳因請句餘公扁其樓曰三台拱秀云丙午八月三日海嘯颶作郡中石坊公署多所傾圯惟茲樓巋然獨存慰余始志是歲鄉舉三十人明年成進士十二人魁二人及第一人館選二人

修城銀四百八十兩內節羨七十兩在庫余雖罷歸當事自能找發必不累趨事民也

清源文獻曰朱鑑字用明晉江人永樂十二年舉人官
至都御史正統己巳之變公涕泣憤恨於君父之仇
疏十餘上皆防邊大計其保障雁門方略至今賴之
黃河清曰詳公之世有足陰維社稷動天地而感鬼
神者惜彭惠安錄本朝名臣於公偶遺也余考吾學
編名臣記弇山堂別集都御史表亦俱未錄余故備
書以俟補錄者按公初授蒲圻教諭以學行擢監察
御史按湖廣廣東俱有諭賊緝奸大績權璫王振挾
駕出師公時陞山西左參政上疏懇留極言虜勢太

皇太后讀其疏泣下土木之變公勒兵勤王以遏南
侵令諭陞右副都御史巡撫山西保障雁門要害公
涕泣憤恨以君父之讎不共戴天上疏言天位不可
以無主神器不可以久虛宜急立儲君選智勇之將
托忠義之臣開直諫之路杜權倖之門早革內侍之
政再造中興之業雪前恥以圖後功公在山西十餘
年前後奏疏皆防邊大計疏多不錄所賜璽書至五
十餘道石亨曾以失機爲公所刻憾公公遂懇致仕
家居二十餘年壽入十八無疾坐逝訃聞諭葬宏治

閒公鄉人王宣從祀鄉賢議云公之爲人雖所行未能盡合聖軌上比孔庭然其精忠峻節餘韻流風自足以風勵人臣楷範後學於是公遂列於俎豆矣王宣者以鄉舉受業蔡文莊公之門養親不仕次崖林氏曰先生俯視一世仰觀千古使竟其所至必有發前聖所未發者後亦從祀因併著焉

臺灣隨筆

清 雲閒徐懷祖燕公著

乙亥之春余再至閩漳竊思廿載萍蹤若燕齊秦
晉魏趙吳越楚粵滇黔之間所遊歷者多矣詎意
復有臺灣之行然觀海亦吾素志慨然往焉凡自
漳入海者皆于石碼登舟由海澄以達廈門金門
而後出大海廈門距海澄三十餘里迤南則爲金
門皆海之歧流所經閩南藩維之最衝者也
禹貢所載自衡岳以南疏瀹無聞蓋以滇蜀之界如黑

水南流滇水西流皆非中原海道閩越之間率多負山面海其水自能歸墟也

凡郡邑之濱海者皆裨海也各有重山疊嶂衛其外即瓊崖崇明定海之地亦尚在裨海中若安南則陸路可達惟臺灣一郡孤峙大海

臺灣千古無考惟明季莆田周嬰著遠遊編載東番記一篇稱臺灣爲臺員蓋閩音也然以爲古探國疑非是

臺灣山甚高亦多平原可耕藝周圍五十里自有土番居之多巢棲而不火食者無所求于中國明天啓時漢人顏思齊誘日本國人屯其地鄭芝龍附之未幾荷蘭人由洋中來假地日本久而不歸遂築城而有之 本朝順治十八年鄭芝龍之子成功京口敗歸廈門欲取臺灣東鹿耳門水漲遂艤舟以臺荷蘭戰不勝拒守久之乃棄城去成功始以夜郎自待矣傳其子經孫克塽外通諸番內擾濱海今

上康熙十八年始命將征之一戰而克澎湖師臺灣而克塽降兵不血刃遂定其地東西五十里南北三千

里置郡一縣三郡治之外則番人居之仍其舊俗
海濱弛禁以後人置漁舟家有商船惟商船可以航海
凡使節往來咸藉之

海艘上平而下銳期于足禦風濤凡百工械具以及日
用糗糒靡不畢備而尤急于儲水偶有被風沙嶼之
上者或至不能粒食而蚶蛤蠃蚌猶堪鼓腹惟水則
必不可得也

自海澄登舟遂行至廈門尙在支流中然已震蕩不甯
矣遙望遠嶼白浪出其上又見他舟似鳧鷖入水復

出腸胃之間爲之溢湧海中率多磧沙舟不可近時
以長竿測之而後行其緣檣者覘雲氣望遠近也緣
帆而上捷于猿猴亦或兩人偕登至于檣末竝坐談
笑自若卽在大海中亦然

廈門築城于山巖兵戍之其地連縣數百里然皆山嶂
也海外迤東屬國皆貿易于此偶見有紅毛番船至
其廣大倍于閩舟而製造精巧尤不能及聞彼一舟
之費以鉅萬計其人能入水而行

舟艤廈門適遇石尤遲回十許日始得西北風而行第

學海類編 卷之三 遊覽
觀其發矻掛帆亦艱辛之甚矻以木爲之長丈餘末
有兩齒如鹿角繫以長絙而遠布之泥淖中船卽止
廈門稍南有團山在中流逾此卽大洋故舟人呼爲
海門云

大海之中波濤洶湧之狀筆不能盡惟是四顧無山水
與天際仰觀重霄飛翔絕影蓋鳥亦不能渡海也以
此知爰居海鳥故非常見若帆檣之側禽鳥翔鳴則
必有島嶼在望矣舟在大洋中風利卽長往風不利
亦可復還所泊處或風勢甚惡舟不得迴則惟有東

西南北任其所之耳

海上風信甚者曰颶尤甚者曰颶可以計日候之或前
或後大約不爽若天邊雲氣如破帆卽颶颶將至斷
電者斷虹也亦風至之徵蘇黨颶風賦所謂斷霓飲
海者指此

海中風利舟行迅決若風恬浪靜則靡靡中流所謂海
船無風不能動者如是日星河漢俯仰爛然風景殊
不惡但苦無繫舟地耳

茫茫海道舟人固不識也惟東西南北則以羅經視之

其所往之地非山不可辨若宵晝行而不見山亦莫測其遠近故有瞻星察氣緣橦遠望辨水之色及視泥沙之臭味者一遇島嶼可以泊舟則尤兢兢焉蓋海嶼雖卑而水中尙多巖巒又有積沙如隄阜皆能敗舟且山上迴颿亦能噓噙其舟而膠之及已泊之後猶恐潮汐往來及戕風猝至故澳中有必不可藏舟之處

島嶼在澎湖甘吉洋在澎湖之東雞籠山在臺灣北鹿耳門在臺灣西皆險要也


臺郡番民種類甚繁莫詳所自或云秦始皇時方士將童男女五百人入海蓋出于茲山而育種至今

臺地物產無異中原略載其異者波羅蜜自荷蘭移種大如斗甘如蜜香樣大如雞子味甘色黃其根在核然不能如荔走長安也照殿紅樹甚高花如巨觥色紅無二樹蘭如珠蘭然亦喬柯修幹竹多叢生節疏葉長至冬則其葉盡落及春復生頗似江柳象齒有實可食林茶亦內地所無惟鱗介之族其形殊異者不可殫述

余之初至廈門也舟人以爲有風候遂登陸假寓已而大風雨者三日夜舟藏曲島幸而得免然聞臺澎之間頗有漂溺矣迨風霽夜發甫出海門行及三鼓風稍厲或有懼色遽命回舟昏黑中捩柁而西幾至不測旣明始達于金明之山後荒嶼無居人僅可避風耳舟泊中流不得登岸抱膝而坐者累日及晴霽無風乃復掛帆則汎汎悠悠舟亦不動反不如平江中可以搖櫓爲力也越三日而至澎湖其嶼甚卑方數十里室廬亦少置軍守之自廈門至此始可泊因

幸其無風遂不繫舟而行又越二日而至臺灣臺灣距廈門不知若干里而舟人稱海程則以更爲計云自廈至臺爲十一更自臺至松江之上洋爲五十六更然問其所謂更者莫解其義也余在臺灣一載乃復從海道歸旣登舟止于鹿耳門十日鹿耳門爲臺灣門戶其水中沙石纍纍環濬出入危險舟行畏之旣而啓行南風甚勁海師以指南針指子癸之次凡三日三夜乃目覩風濤之壯然已逾金廈漳泉而徑達于興化之港矣自閩之興化歷福州福甯入浙之

溫台甯三郡以達于崇明上海凡五日五夜而至皆
行于海濱之歧流中雖有最深廣處而非大洋也



廣州遊覽小志

清 濟南王士正貽上著

光孝寺

光孝寺又名法性寺在粵城西北越王建德故宅也孫

吳虞翻居此手植訶子因名虞苑

又名訶林

東晉隆安五年

罽賓國曇摩耶舍尊者駐錫曰王園寺劉宋永初中求
那羅跋陀三藏始剏戒壇梁天監元年智藥三藏自西
竺來植菩提樹壇前預識曰後一百七十年有肉身菩
薩于此樹下開演上乘達磨初入國中亦止此寺其後

五傳至惠能遂開東山法門于此今祝聖殿曇摩遺跡
也有米元章書三世佛名稍北爲六祖殿前爲菩提壇
壇側爲髮塔其東南爲達磨井西爲五祖殿循廊而東
爲風旛堂堂前有池泓然又東有僞漢鐵塔上有題記
稱大漢皇帝大寶十年四角有沙門某某題名繫銜皆
金紫大夫檢校工部尙書又東爲譯經臺洗硯池房融
筆授首楞嚴處西廊復有一塔規製差小題玉清宮使
德陵使龍德宮使開府儀同三司內侍監上柱國龔澄
樞同女弟子鄧氏三十二娘及大寶六年歲次癸亥字

粵城內外古道場以光孝爲第一氣象古朴殊乎他刹

六朝已還名僧居此者曇摩耶舍求那羅跋陀智藥三

藏初祖六祖印宗法師波羅末陀陳刺史歐陽顥請譯佛阿毗曇經金剛般若

若經無上依經佛性論共四十部般刺密諦譯楞嚴者仰山通智禪師憨山

德清法師天然函罡禪師同遊黃太史忍菴高廷評叟

園屈翁山陳元孝張超然三處士程燕思秀才人賦五

言詩

六榕寺

淨慧寺舊名寶莊嚴寺蘇長公南遷過此書六榕二大

學海類編 卷之三
字因名六榕寺今寺額卽蘇書也寺有舍利塔梁大同中沙門曇裕建舊有唐王勃碑宋紹聖閒寶雞主簿林修重建宗室康州刺史叔盎撰文塔九層高二十丈廣六丈有奇中藏佛牙舍利當修重建時掘得巨鼎藏劍三鏡一同舍利瘞之元至正閒又增寶珠銅柱之屬憑高眺遠則白雲粵秀諸峰皆在襟帶也寺有永嘉禪師證道歌石刻禪師謁六祖祖歎曰善哉少畱一宿宗門謂一宿覺

五羊觀

五羊觀在城中西南坡山上有穗石洞五仙祠吳立夫南海古蹟記云楚高固時有五仙人人持穀穗一莖六出乘羊衣羊具五方色遺穗州人今祠中五石云是羊化殊不類祠後有崇臺可以眺遠其東爲三元殿殿前有池片石陂陀一泓出其中旁有石刻曰仙人足跡傳會可笑湛文簡公少讀書于此有詩刻石同遊者庭表畷園翁山元孝超然燕思光孝寺僧月濤南柄

海幢寺

海幢寺在羊城南下瀕江水洞庭表翁山元孝蒲衣往

學海類編 卷之三 遊覽
遊冒雨發舟二里抵寺門木縣方花望如赤城之霞寺
有鷹爪蘭一林藤本大兩圍幹枝相糾花五出初出綠
色久之漸黃香與魚子蘭酷似寺故郭氏園蘭園中故
物也有藏經閣極偉麗北望白雲粵秀西望石門靈峰
西樵諸山東眺雷峰卽往波羅道也南爲花田南漢葬
宮人處素馨花產此寺爲僧今無所建龍象莊嚴甲諸
刹然無他奇稍宜登眺耳食罷登舟往海珠寺

海珠寺

海珠石在江中上有慈度寺宋李侍郎昉英讀書處寺

有李公祠面丹霞臺下瞰江水北帶羊城估舶漁艇往
來如圖畫爲粵人競渡之所明盛時豪家競以翠毛鶴
毳孔雀尾飾船篷用相誇尙其侈靡如此用兵後築城
置戍其上荒落不復振矣有吳道子石刻觀音像尙存
舟由濠水入魚藻門劉鋹時有稻田自海上浮來布衣
林楚材見兒嘆曰水魚湫湫兮南及宋師至潘美爲帥
人始悟爲潘字云飲濠梁別業晤梁秀才無技

越秀山

越秀山在廣州府城北城堞因山山分爲二東爲歌舞

岡越王臺其西爲觀音閣山半爲呼鸞道僞漢劉龔故蹟也城西爲朝臺山南越志云傍江構起華館以送陸賈因名朝臺也古蹟記云山巔有達磨泉山踞粵城最高處憑高下瞰遠江如帶目盡炎海粵人三月三日九月九日多遊于此城堞閒多榕樹木縣時暮春木縣方花紅照天外亦一奇也

蒲澗寺

三月初四日勞書升憲副約同忍菴叟園元孝遊蒲澗寺寺在白雲山麓氣象疏古寺門諸山環抱門內二石

碣刻宋蘇文忠公詩崔清獻公詞坐禪人大韶範成妙叶堂始食蕉子羊桃菖蒲澗在寺左太平寰宇志云菖蒲澗一名甘溪南越志云交州刺史陸允之所開也襄陽羅友累石澗側容百人坐古蹟記云南漢闢甘泉苑南有陸公亭夾溪刺桐木縣花開殷豔如畫時久旱細流涓涓出石罅中小魚如秧針千百爲羣東上尋濂泉寺半里許得石澗潺湲有聲涉澗而東樹益蒼蔚水聲益清激又半里復涉澗而西澗中巨石欹立騰倚類多姿制岸皆笏竹竹盡得寺寺數弓而朴雅絕塵老僧興

學海類編 卷之五 遊覽
猷居之元孝言郡人陶璜苦子前身寺僧道安也因言
其從父陳公慧業記前生爲廬山僧事甚奇寺去濂泉
尙里許眾疲飢不能登坐澗石蔭竹樹俯聽水聲如鳴
琴筑下山遠見琵琶洲洲上浮圖巋然海鼇寺也歸食
寺門榕下是日甚暑清風洒然山相傳爲安期生得道
處上有景泰寺安期祠

長壽菴

長壽菴在西郭外勑于萬歷閒禪人大汕重新之汕能
詩畫營造有巧思寺西偏有池通珠江水增減應潮汐

池北爲半帆循廊曲折而東爲繪空軒軒前佛桑寶相
諸花叢萃可愛由半帆竝池而南緣岸皆荔支龍眼池
之南爲懷古樓高明洞豁其下爲離六堂水木清華房
廊幽窈如吳越閒寺有拈花釋迦像飾以黃金珠玉車
環瑪瑙瑟瑟之屬莊嚴妙好又有銅像云是唐鑄也

南園三忠祠

大忠祠祀宋文信國陸丞相張越國三公其東祠南園
五先生五先生者孫典籍蕢黃待制哲王給事中佐趙
御史介李長史德明初結詩社于南園此其遺址崇禎

戊寅巡按御史葛徵奇葺三忠祠并鑿五先生詩于版
久之皆廢同年彭吏部襄爲番禺令復新之祠有池閣
背枕河流亦一勝地

遊羅浮記

清 松陵潘 耒次耕著

羅浮之奇勝載於圖經誇於志乘雜見於名賢詩翰者不可勝記中州人士之來嶺南者必以遊羅浮爲辭比其還問羅浮作何狀輒噤不能對第言兵燹後山中道梗泉石榛蕪不可遊蓋十無一至者焉余嘗心怪之去冬客羊城卽銳意欲登羅浮謀諸士人尼余者十人而九歲首之瑞州制府吳公相畱忽忽春盡將告歸公笑曰曾遊羅浮乎遊而還荔枝熟矣啖之歸未晚也余曰

善微公言固將一往遂放舟過五羊遇黎方回爲余言羅浮非難遊苦無棲息地有華首臺者名利也其主僧塵異適在是必與偕行乃可塵公嗣法天然和尚學通內外相見甚喜載與同行以四月十七日發廣州五十餘里抵南海神廟廟甚宏敞有銅鼓二其一徑五尺餘刻鏤精巧青紅班駁扣之淵淵是漢以前物其一徑三尺許聲質俱劣宋時物也歷代諭祭碑鱗列兩廡昌黎碑特高大碑陰及兩旁題刻皆滿廟外高阜上有浴日亭蘇子瞻詩碣存焉臨眺極於虎門際天皆海矣徘徊

至暮宿廟側明日行六十里抵石灣遙望羅浮蒼蒼亘天如橫雲明日行二十餘里抵泊頭飯華首下院舍舟而輿行十餘里雨驟作諸巖岫皆隱不見惟老人峰孤聳雲外若舉手相招者然又十餘里抵華首則已昏黑惟見長松夾道流泉淙淙作金玉聲下榻小樓閱羅浮志將選勝以遊塵公言志不足憑必得里人熟習徑路者導遊乃可黎明起見四山皆重雲蒙頭雨勢未已而山行須竹兜索之近村無有乃伐竹爲之早飯已與塵公步山門有青黃雀飛鳴林間文采絢爛所謂五色雀

客至則迎者也寺門怪石森立東西溪交流鎖織中爲平坡圓正如臺故號華首臺舊云有五百華首菩薩集會於此古刹久廢崇禎閒空隱禪師開法於此博羅韓尙書長公子出家嗣法爲剩人和尙與東莞孝廉張二果共興此刹尙書夫人施田飯僧兵後山中諸菴觀皆毀惟此僅存寺後泉石益奇有合掌巖巨石中空下廣上銳如合十爪有瀑布落懸巖注於平潭飛流四射如傾萬斛珠墜潭面輒躍起數尺最爲壯觀而舊未有名余名之曰躍雪潭潭後爲錦屏峰蒼藤錦石相錯如畫

蔚然是暮雨止新治竹兜成而塵公所覓導遊者黎老人亦至遂以次早出遊五里至黃龍徑又二里至延祥寺基望見梅花村籬落隱隱又十里許至沖虛觀觀故葛稚川所居唐置祠宋立觀往時宏麗甲一山今蓬萊閣遺履軒皆廢惟三清殿存其御簡亭葛仙祠則提督許公郡守呂侯所新葺也黃冠皆散處村落求觀所藏銅龍魚不可得惟得竹葉符數枚葉上鏤文十數疊如繆篆亦異蹟也觀後有稚川丹竈遺址竈下泥云可以療病觀東有澗循澗行百餘步有巨石刻朱明洞三大

字石上有廬稱黃野人廬云觀前白蓮池今廢爲田西南一峰峭拔名麻姑峰有巖名麻姑壇又有朝斗壇皆在榛莽中不可到徙倚觀門塵公出所攜果茗拾落葉烹泉啜之取舊路以歸轉山坳見懸瀑百餘仞曰是中必有佳境黎老人言此水簾洞也乃舍輿策杖溯瀑而上爲大龍潭小龍潭爲藥槽石臼爲大水簾小水簾皆一瀑布也瀑得雨而怒虹奔龍矯碎訇作雷聲穿澗屈曲行或履危石如劍稜或凌飛濤如輪轂路愈險境愈奇澗中平廣處有石坡可坐數十人飛湍旋激名流杯

池云羣仙會飲之所也瀑流有大小而無枯竭澗中石滌蕩久皆作蒼白色如凍雪覆泥又如北方白松膚紋明淨可愛宋人篆書石刻在隔澗懸崖未及捫讀落日銜山促歸華首翼日乃爲黃龍積寶之遊黃龍洞自黃龍徑折而上有南漢天華宮故址洞亦以瀑布爲奇與水簾號東西龍潭勝槩約略相埒瀑中亦有平廣處可鋪文茵可行羽觴有四賢祠久廢在豐草中四賢者周濂溪羅豫章李延平陳白沙也山佳勝處皆寺觀踞之惟此環堵爲儒林而居守無人一毀而莫能復也祠之

後爲老人峰瑤臺峰大石樓小石樓皆秀削峻嶒矗立
翠微中乍開乍合寶積寺在伏虎巖之下有梁景泰禪
師卓錫泉味極甘冽泉在石盤中徑尺深尺汲之隨湧
竭之隨注積雨不盈大旱不涸誠爲神異寺亦久廢新
構精舍數楹前俯斷崖臨望甚曠東有一小潭水亦清
冽石刻云林一仙洗藥池而志書不載與塵公藉蒲團
蔭茂樹吟眺竟日烹泉數瓢盡瓶中茗乃歸歸而議遊
飛雲峰飛雲峰者羅浮絕頂也雖晴明時嘗有雲霧籠
覆去地四十餘里遊人稀得到尼余上者復十人而九

或言磴道陡峻不容兜輿或言夏月草長中有飛蜚伺
人而噬或言山中陰晴不定遊者多爲暴雨所阻余曰
來粵東而不遊羅浮猶不來也遊羅浮而不登飛雲猶
不遊也吾志必往山靈豈拒我哉塵公見余意堅趣辦
行具五更作三十人飯半以葍食半舁上山供午餐遂
自寺右循西溪上竹篙嶺甚巉削五里至嶺頭稍平坦
可乘兜輿又二里至羅漢峰又二里至文殊峰竝斬崖
爲徑下臨絕壑雲蓬蓬然起於足下俄而嵐霧四合上
下混茫無所見或慮雨且作余言冒雨遊亦復佳又前

五里許至寶塔峰峰多杜鵑樹有長丈餘大合抱者老人云春月花開滿山如雲錦婆婆峰下從者進所攜酒滿引數卮而行又前至小尖峰大尖峰又前至三丫峰又前至杜鵑峰自寶塔至是可數里往往穿杜鵑林中行而此峰尤盛叢柯連幹羅生巖閒類名園卉木家人選可徙植者攜之人一本又三里至七星峰峰有七阜又二里至分水凹林樹茂密一澗中流旁多藥草所謂泉源福地者也又二里至鳳凰臺臺有巨石平正如棋枰又里許至阿耨池池在亂石閒徑三尺許渟泓湛碧

旁有平石可坐數人老樹裊雲藤蘿蒼蔚塵公命侍者汲池煮茗出果餅療飢具湯沃飯僕夫而別命童子煮糜粥以待是時雲霧漸開諸峰皆出其頂纍纍如青螺髻又里許至見日菴故址有雜樹數百株森梢竟谷又二里許至飛雲頂頂正尖圓四望洞達於時天無纖雲萬象呈露往時所見大小石樓玉鵝蓬萊諸峰渺在霄漢者皆如培塿帖帖肘腋下其頂可俯而摩也振衣峰巔遊目萬里南望虎門外大海瀰漫一碧無際東見博羅河源象頭平陵諸山北則龍門虎獅天嶺西則增城

牛牯南樵諸山如屏如墉如拱如抱縣延數百里不絕而羅浮在其中尖若千葉蓮花之萼飛雲頂在其上又若九層浮圖之尖所謂高三千六百丈者殆非虛語至稱夜半見日則理之所無以歷術推之日出平地百十里止差分杪高山與平地相去幾何其近海諸山水光浮日光而上見之差早之眾秦岱秦望天台皆東邊海故先見日今羅浮之東連山橫亘無從見水而東南去海不甚遠冬月登山巔見日當差早亦不過晷刻之間大約如日落時下方昏黑山閒猶存返影耳而談者遂云

夜半披衣見火輪射飛濤以出則夸而近於誕矣縱覽久之日已晡乃下至阿耨池啖糜粥以行老人云登飛雲有三路東路由沖虛觀而上則過青霞玉女會真諸峰中路由黃龍洞而上則過瑤臺通天中界諸峰西則今華首路若取一徑以上別取一徑以下再登再下則諸峰之勝盡矣惜乎沖虛寶積不可棲宿不得已尋舊路歸下山宜易於登山而峻處每不畱足與人尤懍懍余大半步行遇峰巒佳處輒躊躇凝望不忍別還至華首而日落矣人爭以無風雨得登飛雲爲賀黎老人亦

言生長茲山見遊山而登飛雲者不過十數人登飛雲而清明極望者尤絕少也天下事敗於猶豫而成於勇決余志一定雨師雲將朱真葛仙羣來相余人定勝天信而有徵塵公謂余何不以此勇決者學道聖域可立躋也余深媿其言羅浮舊志創於永樂時陳琴軒璉嘉靖中黎惟敬民表續成十二卷典雅可觀崇禎末博羅諸生韓德焜別撰新志雖文筆不振而每峰每洞各爲圖說則功多於前人矣然吾觀羅浮二山橫亘數十里秀巖深壑以千百數浮在羅之西北尤大而長今圖經

所載諸名勝皆屬諸羅而浮則槩未之及卽羅亦僅東南一隅在沖虛左右者如華首臺後泉石至佳且無述焉况其他乎誠能攜善畫者裹糧躡屩周行山之前後左右品題而圖繪之附以篇詠勒成一書斯盡善矣塵公豈有意乎余以倦遊遠客勢不能久畱茲山雖弩力登絕巔猶之嘗鼎一臠窺豹一斑已耳惟當就見聞所及刻畫摹寫仰酬山靈而黎方回畱家園黑葉荔枝待我將就之飽啖然後出嶺庶不負吳公盛心且將誇於曾遊嶺南者謂吾所得於諸君獨多也康熙戊辰孟夏

桂林風土記序

前賢撰述有事必書故有三國志荆楚歲時記湘中記
奉天記惟桂林事迹闕然無聞休符因退居粗錄見聞
曰桂林風土記聊以爲敘時唐光化二年九月二十三
日莫休符序

桂林風土記目錄

桂林

舜祠

雙女冢

伏波廟

東觀

越亭

巖光寺

訾家洲

漓山

堯山廟

東山亭

碧潯亭

拜表亭

夾城

獨秀峰

歐陽都護冢

海陽山

會仙里

隱仙亭

靈渠

甘巖

張天師道陵宅

牂牁水

如錦潭

仙人山

遷鷲坊府郭

菩提寺道林和尚

開元寺霍井

延齡寺聖像

宣州龍開江事

徐氏還魂

石氏燈檠崇

米蘭美績

李給事長歌

宋顏延之

李襲志

衛國公李靖

中書令褚遂良

中書令張九齡

桂州陳都督

表恕已

張鷟

桂林風土記

唐

莫休符

撰

桂林

按地里志桂州禹貢荊州之域春秋時越七國時服於

楚秦始皇二十三年發逋亡豎

古者未有年號至漢武帝方紀年名故云始皇

二十三年賈人掠取陸梁之地為桂林吳時文士薛宗言昔

帝舜南巡蒼梧秦置桂林南海象郡南越志漢武改為

鬱林郡以桂林為縣吳書孫皓鳳凰三年分鬱林象郡

為桂林又按圖經云吳甘露年號分鬱林象郡為桂林

今以魏書證之甘露乃高貴卿公曹髦所記年號非吳書也古有名人張衡詩云我所思兮在桂林欲往從之湘水深是則桂林爲郡久矣漢祖命周電擊南越南越王趙佗據險爲城電不能喻今靈川全義嶺有越城漢紀有周電爲泗水侯是呂后時非高祖也地里誌云周電未知其詳

按史記南越傳高后遣將軍隆慮侯竈往擊之

舜祠

舜祠在虞山之下有澄潭號皇潭古老相承言舜南巡曾游此潭今每遇歲旱張旗震鼓請雨多應中有大魚

遇洪水泛下至府東門河際有亭容巨舫往往載起然終不爲人之害舊傳舜葬蒼梧邱在道州江華縣九疑山也

雙女冢

在府城北十里俗傳舜妃尋帝卒而葬于此冢高十餘丈周迴二里餘

伏波廟

伏波廟在郭中之東北二里是東漢伏波將軍馬援之祠也

東觀

觀在府郭三里隔長河其東南皆崇山巨壑綠竹青松
崆峒幽奇登臨險隘不可名狀有石門似公府之狀而
隘彙燭行五十步有洞穴坦平如毬場可容千百人如
此者八九所約略相似皆有清泉淥水乳液葩漿怪石
嵌空龍盤虎踞引燭緣涉竟日而還終莫能際相傳云
昔有人好泉石多束花果裹糧深涉而行還計其所行
已及東河之下如聞棹楫濡濡之聲在其上又有山外
高峰舊有亭臺近已摧壞前政張侍郎名固大中年重

陽節宴於此從事盧順之贈固詩曰渡江旌旆動魚龍
令節開筵上碧峰翡翠巢低巖桂小茱萸房溼露香濃
白雲郊外無塵事黃菊筵中盡醉容好是謝公高興處
夕陽歸騎出疏松張侍郎和詩曰亂山青翠郡城東爽
節憑高一望通交友會時絲管合羽觴飛處笑言同金
英耀彩晴雲外玉樹凝霜暮雨中高詠已勞潘岳思醉
歡慚道自車公咸通年前政張大夫重遊東觀詩曰巖
岫碧潺湲靈蹤若可攀樓臺烟靄外松竹翠微閒玉液
寒深洞秋光秀遠山憑君指歸路何處是人寰

越亭

在府城北與聖壽寺接連有巖洞庭臺高峰聳碧山穴
透出北面因名北牖洞遠眺長江極目烟水北人至此
多整鄉思會昌初前使元常侍名晦搜達金貂翱翔翰
林揚歷臺省性好巖沼時恣盤游建大八角亭寫其真
院砌臺釣榭石室蓮枕流杯亭花藥院時爲絕景于時
潞寇初平四郊無壘公私宴聚較勝爭先美節良辰尋
芳選勝管絃車馬闐隘路隅金貂從此府除浙東畱題
白紫泥遠自金鑿降朱旆翻馳鏡水頭陶令風光偏畏

夜子牟衰鬢暗驚秋西鄰月色何時見南國春光豈再
游莫遣豔歌催客醉不堪回首翠娥愁副車路單與金
貂同年及第和詩一首謝安致理逾三載黃霸清聲徹
九重猶輟珮環歸鳳闕且將仁政到稽峰林閒立馬羅
千騎池上開筵醉一鐘共喜甘棠有新詠獨慚霜鬢又
攀龍越亭初成金貂有六十韻長詩曰乏才叨入使徇
祿非三顧北闕頒詔條東鄰證迷悞未聞述職效已見
脫煩趣灑氣爽衣巾嵐颺輕杖屨

其餘不省記

巖光亭

在北羅門外臺亭巖洞亞於越亭亦是元常侍新置有石碁局爛柯石嶂金貂有五十韻詩云石靜如開鏡山高若聳蓮筍抽玉管花蔓綴金鈿

餘不省記

訾家洲

在子城東南百餘步長河中先是訾家所居因以名焉洲每經大水不曾淹浸相承言其浮也元和中裴大夫

名行立四子歸之歸仁歸聞歸禮庶因獲朝溪也

勅造亭宇種植花木迄今繁

盛東風融和眾卉爭妍有大儒柳宗元員外撰碑千餘言猶在前汴州楊尚書宴游題詩云桂林雲物畫漫漫

雨裏花開雨裏殘惟有今朝好風景櫻桃含笑柳眉攢新政從事陸宏休詩云新春藥綻訾家洲信是南方最勝游酒滿百分殊不怕人添一歲更堪愁鶯聲暗逐歌聲豔花態還隨舞態羞莫惜今朝同酩酊任他龜鶴與蜉蝣

漓山

在訾家洲西一名沈水山以其山在水中遂名之古老相傳龍朔中曾降天使投龍于此今每歲旱請雨潭中多有應前政元常侍以其名與昭應驪山音同故遂改

學海類編 卷之五 遊覽
爲儀山近歲于此置溫靈廟廟中時產青蛇號爲龍駒
翠色或緣人頭頂手中終無患害

堯山廟

在府之東北隔大江與舜祠相望遂名堯山山有廟絕
靈四時公私饗奠不絕北接湖山連亘千餘里天將降
雨則雲霧四起逡巡風雨互至每歲農耕候雨輒以堯
山雲卜期

東山亭

府之東門有大亭枕江與望月樓接連近子城建豎多

年不記歲月

碧溥亭

去思館是

亭館大中初前韋舍人瓘勅造在子城東北隅十餘步
接近逍遙樓角近大江館宇宏麗制作精緻高下敞豁
冠諸亭院去思館舊名青桂館前政吏部張侍郎鶩除
替飾裝於此遂改爲去思館韋舍人年十九入闕選進
士舉二十一進士狀頭榜下除左拾遺於時名重縉紳
指期直上馬相爲長安令二十八度候謁不蒙一見後
任廉察桂林纔半歲而馬相執大政尋追懷舊事非時

除賓客分司悵望畱詩於碧潯亭曰半年領郡固無勞
一日爲心素所操輪奐未成繩墨在規模已壯閱閱高
理人雖切才長短薄宦都緣命不遭從此歸耕洛川上
大千江路任風濤

拜表亭

北接碧潯南連望月東甫長河西鄰雉堞前政山北盧
尙書匡漆建置

夾城

從子城西北角二百步此上抵伏波山緣江南下抵子

城逍遙樓周迴六七里光啓年中前政陳太保可環剗
造三分之一是諸營展力日役萬人不時而就增崇氣
色殿若長城南北行旅皆集于此

獨秀峰

在郭中居子城正北百餘步高聳直上周回一里餘迴
出郭中下有巖洞舊有宋朝名儒顏延之宅讀書亭後
爲從事所居往往見靈精居者少甯前政張侍郎廢毀
焉

歐陽都護冢

府北郭松逕盡處有國初安南都護名普讚冢墓普讚靈川人其宅今爲聖壽寺有廟在寺之北下歿後殯于北郭時有識地勢者言葬所有天子氣由是官掘斷至夜又有陰兵填平如舊旣而再掘復平不已時有効役者人偶宿其所夜聞鬼兵相語曰能以青布運土投江則我等無能爲也及明主吏聞宿者言遂用青布輦運土投河竟免陰兵填築今墳所掘處猶存有石人石柱皆在松楸百餘株近爲樵者斫伐無餘子孫自千數年湮沒無聞或云訾家洲因運此土流下成洲有歐陽牘

者詩絕句曰舊業分明桂水頭人閒業盡水空流春風日暮江頭立不及漁翁有釣舟

海陽山

在全義縣北及漓湘二水源也流至金義北三百步分流北去作爲湘南下爲漓山下有廟前政陳太保奏錄詔封廣潤侯

會仙里

南去府五十里舊有羣仙於此輜輶羽駕徧於碧空竟日而去里人聚觀壯聞因名會仙里

隱仙亭

本名盤龍岡在府西郭三里與延齡寺甫近寶歷年前使李給事名渤開置亭臺種植花木有池沼巨巖水深無際有嘉蓮洞白雀洞石盆大亭又慶雲亭在山頂朝陽亭夕陽亭連理橋秉燭巡游時見龍跡大如椀水有靈魚龍腹四足人或誤擒風雨立至山河秀異皆入畫圖作屏障爲信好之珍有從事皇甫湜吳武陵撰碑碣二所給事徵起山中一表薦九賢皆居顯貴給事爲考功郎宰相皆書下考以天子巡游蹂禾稼無所獻替故

也除桂林有歎烏詩曰三朝四黜倦遐征往復皆愁萬里程爾解分飛卻回去我方從此向南行又題隱山詩二首常嘆源泉去不回我今自去更難來欲知一一畱心處手種巖花次第開隨雲不厭蒼梧遠似鴈逢春又北飛惟有隱山溪上月他時相望兩依依

靈渠

全義縣濼湘二水分流處相傳曰後漢伏波將軍馬援開川濬濟水急曲折四牙用遏其節節斗門以駐其勢有伏波廟在縣側又按後漢鄭宏奏交趾七郡貢錢從

東泛海多沒溺請開桂嶺靈渠後御史史祿重開闢又
按前漢武帝元鼎五年命伏波將軍路博德樓船將軍
楊僕戈船將軍嚴助擊南越呂嘉戈船出零陵下漓水
此則前漢嶺首已通舟楫明矣焉得至後漢馬援鄭宏
開靈渠於理未盡言馬鄭重修則可云創闢則於義有
乖休符駁

甘巖

在府南八十里大江傍其源出臨川縣界思磨山自水
下湧出巖方十餘丈大如屋室莫究其深淺盛暑到彼

凜冽增寒

張天師道陵宅

天師舊宅在賀州道錄以爲元中大法師令以宅爲廟
廟中有美異菓實有人食之無患唯不可採取必致禍
也

牂牁水

在巖州州門長河其源從牂牁流下八十餘丈本州圖
經所載

如錦潭

摩郡有如錦潭水深無際近歲有人伐潭邊巨木樹倒入潭中逡巡沈沒莫知所在潭中時聞音樂如大府廣筵移時而止

仙人山

象州武仙縣多有神仙聚集高山羽駕時見如建州武夷山皆有仙人換骨函觀之跡

遷鸞坊府郭

遷鸞坊本名阜財在市西門因曹鄴中丞進士及第前政令狐大夫改爲遷鸞坊在府西門進賢坊長街因趙

觀文狀頭及第前陳太保改坊名

菩提寺道林和尚

往年中桂州人薛公元常供養一僧法號道林如是精心供養十有餘年忽一日其僧辭去云貧道歸去撓瀆多年更無可酬今只有舊轉經一函且寄宅中如至周歲不回即可開轉讀如此經一歲開鎖有金滿函可數千兩後賣一半買地造菩提寺并建道林真身供養今儀像見存薛今見有孫禹賓在桂林効職

開元寺震井

隋曰緣化寺後因紗燈延火燒燬重建元宗朝改名開元寺有前使褚公親筆寫金剛經碑在舍利塔前西有觀音寺井貞元中有李氏因左遷寓居僧院屬暑月以食餘熟羊脾懸井中逡巡雷震暴作羊肉置於隙地而烟氣薰灼犬不食蟻不附至今僧俗眾言井有龍至云愚以理裁有異於此夫龍嗜血食肉重牢醴人有享祭必選良肉醇酒潔饌珍羞然後精禮甯有一羊脾而迅雷震之者蓋以伽藍井中奉獻諸佛眾僧而遽以肉味羶汚神祈之所是以不容乃致雷擊去理必然矣其井

終亦塌壞先令狐相從事當府因撰震井記然以羊微事曾未移時天鑑已知則人之善惡或愈於此又豈殲遺於陰報乎昔董卓縱暴爲呂布殺而曝屍其亭後有故吏收其灰以小棺殯於郡城又遭風雨漂流失其所

在楊國忠以貴妃因椒房承寵綰三十二使印綬天寶十三載二月拜司空冊命之日天雨土霑朝服未幾族滅於馬嵬關西楊氏遠四知去三惑歷千載而慶延子孫則禍福無門唯人所召矣故孔明有言勿以惡小而爲之勿以善小而不爲苟能佩服斯言以神祇爲證則

終身不居有過之地

延齡寺聖像

寺在府之西郭郊三里甫近隱山舊號西慶林寺武宗廢毀宣宗再崇峰巒牙張雲木交映爲一府勝游之所寺有古像徵於碑碣蓋廬舍那佛之所報身也此地元本荆榛先無寺宇因大水漂流巨材至時有工人操斧斤斫伐將欲下斫忽見一梵僧立在木傍有曰此木有靈爾宜勿伐旣而罷去又有洗蔬者於其上則浮濯董辛於其上又沈雅契梵僧之言由是咸知有靈遂刻削

爲僧佛當則天后臨朝之日夢金人長一丈六尺乞袈裟及詔大臣問其事皆莫能解旋奏陛下旣有此夢乞依夢中造袈裟懸於國門以俟符驗明早大臣奏懸袈裟忘收已失遂詔天下求之已在桂州廬舍那佛身至今尊卑歸敬遐邇欽崇時旱請雨皆有響應如意

宣州龍開江事

桂之縻郡有宣州其河如桂州楊江水岸深斗形勢異於眾水古老流側近岡上俄頃夫還妻以告之夫疑是惡人尋至岡所求不見但見百牛旣夜乃還家至明遂

遇水漲流木蔽江合蒼梧耆老盡知之

徐氏還魂

昔西漢武帝有神通之異南朝有干寶述幽府冥祕之言蘇泉崔韶亦紀靈怪牛丞相著三卷妖錄及徐氏還魂皆鄙夫鄰居任咸通末莫非日驗方證不誣陽朔居人蘇太元妻產三子徐已疾終既殯忽一日還家但聞語而不見形云其年命未終冥司不錄今且暫歸憐撫其子補綻其衣一切如在稍經旬月鄰伍旋知占卜吉凶述善惡一一符驗有鄉人在府充職染疾其家眷屬

請卜之俄頃刻云去至涼風館南地名柘木林遇虎當道不敢過遂卻回卜者情迫堅請再往俄頃曰至府見疾者已瘥疑其不實遂問其所居部曲疾人形貌徐氏不曾至府又未識病者一言之無差異方明其實又有求人卜了謝曰無物奉酬深爲不足徐氏曰汝家有三斗粟子在西房何得稱爲無卜者請取之逡巡負粟子至其前眾皆愕然卜者尤所慚恥如此不一難備書述一日言舜帝差人討蠻有人求至近驛助備熟食更一兩日當還如期而歸將得冥司明分細飲致夫前曰

此飯曷若人閒造者夫視之品饌則倍珍於施食又一
旦泣告曰無端洩陰閒事獲罪蒙遣追此去難再還好
看兒女又泣別遂絕音響太元尙在

石氏射樟木燈檠祟

開成中桂林禪將石從武居任子城西壕側從武早習
弓矢忽一年家內染患疾長幼罕有安者每至深夜常
見一人從內出來體有光燄居常令疾者痛苦稍閒若
此物至則呻吟聲加甚醫巫醮謝皆莫能效從武心疑
精邪爲祟至夜操弓挾箭映戶潛形候其來俄聞精復

至稍近遂彀弓引滿一發中焉見被焰光星散而滅遂
命燭而看視之乃是家中舊使樟木燈檠中箭而倒乃
劈爲齏粉焚爇爲灰送長河於是家人患者皆愈大中
年前政張侍郎名文規三代台相之家 嘉貞宏靖延賞
廉察桂林從武時職司通引他聞此事曾召問具以實
對乃爲石氏射燈檠傳從武子勛在職近方去世孫清
諧嗣亦効卑職得金貂傳聞

米蘭美績

長慶中前政李給事名渤字濬之自給事中除桂林奏

學海類編 卷之三
請名儒吳武陵爲倅故事副車上任具囊韉通詩文數
日於毬場致宴酒酣吳乃致詞云奉約同游山水奈何
以紅帛繫予首仍命婦女於看棚聚觀相恥旣彼我醜
顏各爭意氣吳爲臺盤坐褰衣躡露以溺給事怒命衙
士拉送衙司梟首時都押衙米蘭知其不可遂引而寢
多遣人護衛給事扶歸寢堂夜半而覺聞家人聚哭甚
悲驚而問焉乃曰昨聞設亭喧噪又聞命衙司斬副使
不知其由憂及禍是以悲泣給事大驚亟命遞問之米
蘭具啓昨雖奉嚴旨未敢承命副車猶寢在衙院無苦

給事達明早立至衙院卑詞引過上下俱自克責益相
敬奉時未有監軍於是乃奏米蘭牧于象郡以酬勅下
允從遂又以使衙儀衛送上本任

李給事長歌

李給事名渤爲太學博士喜長歌弟淑舟至歌曰前年
別時秋九月白露爲霜金吹烈離鴻一別影初分淚袖
雙揮心哽咽別來幾度得音書南岳知

此下闕文

廬山峨

峨依天碧捧排空岸千萬尺社榜長題高士名食堂每
記雲山跡我本開雲此山住偶爲名利相索誤自負心

機四十年羞聞社客山中篇憂時魂夢憶歸路覺來疑
在林中眠昨日亭前烏鵲喜果得今朝爾來此我吟行
路五十篇盡說江南數千里自憐兄弟今五人共索儒
素家尙貧雖然稟氣各不一就中摠免拘常倫長兄年
少曾落拓拔劍沙場隨衛霍口裏雖譚周孔文懷中不
舍孫吳略次兄一生能苦節夏聚流螢冬映雪非論惡
疾志如霜更覺臨泉心似鐵第三之兄更奇異昂昂獨
負青雲志下看金玉不如泥肯道王侯身可貴卻愁清
逸不干時高蹤大器無人知倘逢感激許然諾必能萬

古畱清規念爾年來方二十夙夜孜孜能獨立卷中筆
落星漢搖峒裏丹靈鬼神泣嗟余流浪心最狂十年學
劍逢時康心中不解事拘束世閒談笑多相妨廣海青
山殊未足逢著高樓還醉宿朝走安公櫪上駒暮偷陶
令籬邊菊近來詩思殊無況苦被時流不相放雲騰浪
走勢未衰雀膝蜂腰豈能障送爾爲文殊不識貴從一
一傳胸臆若到湖南見紫霄會須待我同攀陟

宋顏延之

宋顏延之字延年琅琊臨沂人曾祖含父顯延之少孤

貧居附南郭空巷甚陋好讀書無不覽文章之美冠絕當時好飲酒不拘細行年三十尙未婚起家豫章公世子參軍累官祕書監宋太祖文皇帝諱義隆宋氏第三主昵愛僧惠琳常獨占一榻延之因醉白曰昔劉盆子尙同參軍乘輿袁絲正色曰此三公之座豈可以刑餘之人居之延之性方直言無所迴避居身清約不求財利布衣蔬食獨酌郊野與謝靈運以詞彩齊名而遲速相懸嘗敕俱入擬樂府上篇延之靈運立成而久而方就帝問其優劣于鮑昭昭曰謝五言如芙蓉初發自然可愛顏詩鋪錦列繡彫績滿眼尋爲始安郡經過潯陽日造淵明飲焉每遇一佳景必酣醉而還臨去畱錢二百萬與淵明悉送酒家及淵明卒延之爲之誄以孝建三年卒年七十三贈特進自潘岳陸機之作文士莫及顏謝焉

李襲志

李襲志全州安康人也仕隋歷始安郡丞大業末江外盜賊尤多襲志散家財召得三千人以守郡城高祖受隋禪降璽書勞問編入屬藉授桂州總管前後任桂州

學海類編
凡三十八載政尚清簡嶺外安之後上表請入朝拜右
光祿行汾州刺史致仕卒子家

衛國公李靖

李靖字藥師雍州三原人也姿貌瓌偉有文武才略武
德二年同趙郡王孝恭至江陵破蕭銑四十萬擒銑赴
京承制度嶺至桂州分路招撫大首領馮盎李光庭等
懷輯九十六州六十萬戶詔充嶺南道安撫大使檢校
桂州大總管武德六年征輔公祐於江淮平之又領兵
出塞屢顯大功拜右僕射平章事封衛國公薨年七十

九桂州子城自衛國公所製號曰始安郡城

中書令褚遂良

令公散騎常侍亮之子仕太宗啓沃聖心恢宏帝業歷
官中書令高宗將廢王皇后立武昭儀爲后令公受先
皇寄托之重極諫以爲不可由是忤旨貶潭州顯慶二
年又貶桂州時李義府許敬宗傾巧曲佞附記皇后重
貶令公愛州明年卒於貶所年六十二死後二年又追
制官爵子孫竝流愛州高宗崩遺詔復爵

中書令張九齡

張九齡一名博物韶州曲江人以文學進士及高第與趙冬曦齊名俄應制以明皇嗣位久在南郊上表抗論由是名價益重與燕國公張說同姓以詞學親洽時括田使宇文融于預朝政說惡之融所奏論多見抑挫不行融與臺丞連表訟說帝令說藉草辨對高力士密奏以說有大功于國不宜挫辱乃落下平章事坐家九齡連坐貶趙州又以家鄉不便乞換回近嶺南一處遂出江西俄轉桂州都督兼嶺南按察使薨是年六十八

桂州陳都督

國朝呂才博士博涉羣書該通眾藝爲太宗皇帝所知著陰陽吉凶地理要訣五十餘卷行于世今之婚姻占卜多用其言又別著駁陰陽數千言以爲行年冢宅五行皆不可信愚以爲呂氏多才多學博古辨今不欲世人曉達陰陽輒恃年命罔知敬慎博士前知遂立斯言以節逾僭若合前史焉得稱無昔寧氏起宅相者云必出賢甥魏舒由是甚顯遇羊祜少時有占地者言墓合出天子祜惡而掘之占者云猶出折臂三公祜因墜馬折臂竟位三公陶侃微時種瓜有老人求瓜侃厚惠之

其人感此因指牛眠岡可貴侃用葬母位至太尉吳主孫氏家世富春葬於城東岡冢上常結五色慶雲齊主蕭道成先塋在武進縣其上結慶雲宋明帝命獵人以五尺鐵釘之又柱忽作龍吟驚震山谷皆福昆嗣略據所聞以爲證議陳思應本名聿修富州龍平人也少居鄉里以博學爲志開元中忽有異人求寄宿畢聿修觀其容止稍有異乃盡禮延之明日將告去謂聿修曰某久攻地理頗有十全一宿淹留厚蒙情禮思有所報遙見此洲上五里地形當富貴不可言用爲殯岡必福昆

嗣聿修忻然相感遂同詣其處視之客曰若葬此處可
世世出郡守又指一處曰若用此處可世世爲都督聿
修敬謝分袂而去居數載喪母親遂以所指都督處爲
塋他日拜墳忽見其地產金筍甚眾默追宿客之言又
覩金筍斯驗益以自負遂採而歸旣再至金筍又產三
載服闋所獲多矣因攜入京以求遇素鮮知己茫然暗
投見晦朔及弔慶公侯相府侍兒通傳有憩于民舍者
聿修厚許其直求稅一褐爲之逆旅俄而節朔貴門侍
者復至聿修悉以金筍銜其目果異而問焉頗亦敬奉

學海類編 卷之三
粗蒙善遇因以金筍爲賂居數日又遣人覆檢聿修得
以所業文詞經斷綴之金筍獻遺未幾朝貴咸聞或有
引遠者又以文業干之凡諸要地盡知其名稍得歧路
進取益切於時有同姓名思應者亦以昭穆情昵乃以
前任告牒相遺因易名干執政遂特除桂州都督今府
署大廳廳壁記且列名氏亦有子孫職於本郡故鄙諺
有云良宅吉冢緣者遇之信然矣

表恕己

恕己滄州東光人也長安中爲刑部少卿與張柬之崔

元偉敬暉桓彥範等五王建議時則天不豫張易之與
弟昌宗入內侍疾將圖不軌恕己等與左羽林將軍李
多祚率兵五百人就宮中斬易之昌宗梟首天津橋廢
則天迎中宗卽位重興大唐社稷功格天地武三思用
張計潛與中宗韋后私通帝雅信后言計無不成行意
流貶五王於嶺南尋發僞旨使周利正盡殺之恕己流
懷州利正逼令服野葛汁不死以手爬地取土而食介
甲皆盡至骨乃擊殺之睿宗誅韋后方雪其冤恕己孫
高貞元中歷給事中謇諤雅傳家法憲宗制追贈左丞

學海類編 卷之三
高父建官至太府卿

張鷟

張鷟字文成深川陸渾人也後趙右侯賓之裔鷟少聰敏過人其祖齊工文學以當時儒士多稱鷟之才莫不嘆異因曰我孫爲人所知如天以鷟鷟爲鳳凰之佐五色成文因名鷟字文成弱冠應舉下筆成章中書侍郎薛元超特授襄樂尉遷監察御史司門員外開元中姚元崇爲相誣其奉使江南受遺賜死其子上表請代父死黃門侍郎張廷珪刑部尚書李白等連表稱冤遂減

死流嶺南數年起爲龔州長史卒年七十三文成凡七舉四參選皆中甲科正諫夫夫員半千謂人曰張子之文如青銅錢萬揀萬中時號青銅錢學士久視中太官令馬仙童陷突厥中默啜問曰文成何在此人何不足用又新羅日本國前後遣使入貢多求文成文集歸本國其爲聲名遠播如此著雕龍策帝王龜鏡朝野僉載二百卷文武成以五爲縣尉因著才命論以適志盛行於世有李季孫者注才命論言是燕公詞蓋不覽唐史率意紀文大惑時人一向紕繆

休符駁議

